

資治通鑑補

資治通鑑補卷第二百四十六

宋涑水司馬光編集

後學天台胡三省音註

明

後學吳郡嚴衍補

後學吳郡談允厚參

唐紀六十二

起開成三年盡武宗
會昌二年凡五年

文宗元聖昭獻孝皇帝下

戊辰開成三年春正月甲子李石入朝中途有盜射之微傷左右奔散石馬驚馳歸第又有盜邀擊於坊門斷其馬尾僅而得免上聞之大驚命神策六軍遣兵防衛敕中外捕盜甚急竟無所獲乙丑百官入朝者九人而已京城數日方安丁卯追贈故齊王湊為懷懿太子知湊之冤也湊被枉事見二百四十四卷太和五年戊辰以鹽鐵轉運使戶部

尙書楊嗣復戶部侍郎判戶部李珣竝同平章事

考異曰舊唐三年楊嗣復輔政

萬珣以本官同平章事按

珣與嗣復竝命今從實錄判使如故

判謂判戶部使謂璽徽轉運使

子也

宦官恣橫入情危懼賴中書侍郎同平章事李石忘身

徇國故紀綱粗立仇士良疾之如讎故潛遣盜殺之雖有天幸不

至損璽石懼後終不保乃累表稱疾辭位上深知其故而無如之

何丙子以石同平章事充荆南節度使及赴鎮宴賚之儀竝闕人

士傷之

陳夷行性介直惡楊嗣復爲人每議政事多相詆斥二

月壬辰夷行以足疾辭位不許

上謂起居舍人魏謩曰卿家書

詔頗有存者乎謩對曰比多失墜惟簪笏見存乃命謩獻其祖文

貞公笏鄭覃曰在人不在笏上曰亦甘棠之比也

楊嗣復欲援

進李宗閔恐爲鄭覃所沮乃先令宦官諷上上臨朝謂宰相曰宗

閉積年在外宜與一官鄭覃曰陛下若憐宗閔之遠止可移近地

數百里不宜再用用之臣請先避位陳夷行曰宗閔養成鄭注幾

覆朝廷陛下何愛此纖人纖人猶言小人也楊嗣復曰太和末宗閔德裕

同時得罪二年之間德裕再量移為淮南節度使而宗閔尚在貶

所事實得中不可但徇愛憎上曰可與一州覃曰與州太優止可

洪州司馬耳洪州京師東南三千九十里因與嗣復互相詆訐以為黨上曰與

一州無傷覃等退上謂起居郎周徹復舍人魏謩曰宰相誼爭如

此可乎唐制起居郎起居舍人掌錄天子起居法度天子御正殿則起居左舍人居右有命俯陛以聽每仗下天子與宰相

議政事郎舍人亦令侍左右若仗在紫宸內閣則對曰誠為不可

然覃等盡忠憤激不自覺耳丁酉以衡州司馬李宗閔為杭州刺

史李固言與楊嗣復李珣善故引居大政以排鄭覃陳夷行每議

政之際是非鋒起上不能決也 三月牂柯寇涪州清溪鎮

牂柯在涪州東九百里東距辰州二千四百里

鎮兵擊卻之 初太和中杜悰爲鳳翔節度

使有詔沙汰僧尼時有五色雲見於岐山近瀝門寺民閒訛言佛

骨降祥

佛骨在法門寺故云然

以僧尼不安之故監軍欲奏之悰曰雲物變

色何常之有佛若果愛僧尼當見於京師未幾獲白兔監軍又欲

奏之曰此西方之瑞也悰曰野獸未馴且宜畜之旬日而斃監軍

不悅以爲掩蔽聖德獨畫圖獻之及鄭注代悰鎮鳳翔奏紫雲見

又獻白雉是歲八月有甘露降於紫宸殿前櫻桃之上上親採而

嘗之百官稱賀其十一月遂有金吾甘露之變及悰爲工部尚書

判度支河中奏騶虞見

詩註騶虞義獸白虎黑文不食生物有至信之德則應之司馬相如封禪書曰殷衆

之獸樂我君囿白質黑章其儀可喜師古注百官稱賀上謂悰曰

謂騶虞也山海經騶虞如虎五色尾長於身

百官稱賀上謂悰曰

李訓鄭注皆因瑞以售其亂乃知瑞物非國之慶卿前在鳳翔不
奏白兔真先覺也對曰昔河出圖伏羲以畫八卦洛出書大禹以
敘九疇皆有益於人故足尚也至於禽獸草木之瑞何時無之劉
聰桀逆黃龍三見石季龍暴虐得蒼麟十六白鹿七以駕芝蓋以
是觀之瑞豈在德元宗嘗爲潞州別駕及卽位潞州奏十九瑞元
宗曰朕在潞州惟知勤職業此等瑞物皆不知也願陛下專以百
姓富安爲國慶自餘不足取也上善之他日謂宰相曰時和年豐
是爲上瑞嘉禾靈芝誠何益于事宰相因言春秋記災異以儆人
君而不書祥瑞用此故也夏五月乙亥詔諸道有瑞皆無得以聞
亦勿申牒所司其臘饗太廟唐制四孟及臘享于太廟唐臘用寅及饗太清宮元宗二年以西京元元皇帝廟爲太清宮元日受朝奏祥瑞皆停六典凡大祥瑞隨卽表奏文武百僚請闕奉賀

其他並年終具表以聞有司告廟百寮諸國奉賀又儀制令大端
即隨表奏聞中瑞下瑞申報有司元日聞奏今皆停罷考異曰實
錄初上謂宰臣曰歲時人安豈非上瑞宰相因言春秋不書祥
瑞上深然之遂有此詔補國史以爲因杜稔進言今兼取之

初靈武節度使王晏平自盜賊七千餘緡上以其父智興有功免

死長流康州晏平密請於魏鎮幽三節度使魏帥何進滔鎮幽王
元達幽帥史元忠

使上表雪己上不得已六月壬寅改永州司戶 八月甲午山南

東道諸州大水田稼漂盡丁酉遣使分道宣慰 己亥嘉王運薨

運代太子承之母王德妃無寵爲楊賢妃所譖而死太子頗好

遊宴昵近小人賢妃日夜毀之九月壬戌上開延英召宰相及兩

省御史郎官疏太子過惡議廢之曰是宜爲天子乎羣臣皆言太

子年少容有改過國本至重豈可輕動御史中丞狄兼謩論之尤

切至於涕泣給事中韋溫曰陛下惟一子不教陷之至是豈獨太

子之過乎癸亥翰林學士六人神策六軍軍使十六人復上表論

之上意稍解是夕太子始得歸少陽院如京使王少華等

唐置如京使以

武臣爲之內職也未知所職何事

及宦官宮人坐流死者數十人義武節度使

張瑄在鎮十五年爲幽鎮所憚及有疾請入朝朝廷未及制置疾

甚戒其子元益舉族歸朝毋得效河北故事及薨軍中欲立元益

觀察畱後李士垂不可眾殺之又殺大將十餘人壬申以易州刺

史李仲遷爲義武節度使義武馬軍都虞候何清朝自拔歸朝癸

酉以爲儀州刺史

宋白曰遼州樂平郡唐武德三年置遼州八年改爲冀州先天二年以元宗嫌名改爲儀州

朝廷以義昌節度使李彥佐在鎮久甲戌以德州刺史劉約爲

節度副使欲以代之開成以來神策將吏遷官多不聞奏直牒

中書令覆奏施行遷改殆無虛日癸未始詔神策將吏改官皆先

奏聞狀至中書然後檢勘施行 冬十月易定監軍奏軍中不納

李仲遷請以張元益為留後 太子永猶不悅庚子暴斃諡曰莊

恪 乙巳以左金吾大將軍郭旼為邠甯節度使

考異曰舊柳公

維傳作旼案子

儀子姪名皆連

宰相議發兵討易定上曰易定地狹人貧軍資

半仰度支急之則靡所不為緩之則自生變但謹備四境以俟之

乃除張元益代州刺史頃之軍中果有異議乃上表以不便李仲

遷為辭朝廷為之罷仲遷十一月壬戌詔俟元益出定州其義武

將士始謀立元益者皆赦不問 驛星出東方東西竟天 以義

昌節度使李彥佐為天平節度使以劉約為義昌節度使 丁卯

張元益出定州

考異曰補國史曰易定張公權卒三軍請公權子

元益繼統軍務公權乃孝忠孫也公權雖死之際

誠元益歸關三軍後故盧鎮魏三道自立連帥坐邀制命廟謀未

決丞相尚公欲伐而克之貞穆公議未可興師且行弔贈禮追元

益赴闕若拒命該應討之不遲上前互陳短長未行朝典貞穆公
有言我進追元益詔意云敕張元益卿太祖孝忠功列鼎彝垂於
不朽卿乃祖茂昭克荷遺訓不墜義風文宗覽詔意深叶肯謀詔
下是州元益拜請備哭焚香哀請死於眾三軍將士南向稽首蹈
舞流涕扶元益就苦廬請監軍使韓府進諸道例各知爾後公瑋
遂全家赴闕詔以神策軍使陳君實爲帥所請貞穆公者李瑋也
案貞穆公定州牙將非孝忠孫又李德裕此年 庚午上問翰林
不爲相補國史蓋傳聞之說不可據今從實錄

學士柳公權以外議對曰郭旼除邠甯外閒頗以爲疑上曰旼尙
父之姪太后叔父在官無過自金吾作小鎮外閒何尤焉對曰非
謂旼不應爲節度使也聞陛下近收旼二女入宮有之乎上曰然
入參太皇太后耳公權曰外閒不知皆云旼納女後宮故得方鎮
上俛首良久曰然則奈何對曰獨有自南內遣歸其家則外議自
息矣是日太皇太后遣中使送二女還旼家 上好詩嘗欲置詩
學士李瑋曰今之詩人浮薄無益於理乃止 甲戌以蔡州刺史

韓威爲義武節度使 河東節度使司徒中書令裴度以疾求歸

東都十二月辛丑詔度入知政事遣中使教諭上道 鄭覃累表

辭位丙午詔三五日一入中書 是歲吐蕃彝泰贊普卒弟達磨

立彝泰多病委政大臣由是僅能自守久不爲邊患達磨荒淫殘

虐國人不附災異相繼吐蕃益衰

考異曰彝泰卒及達磨立實錄不書舊傳賴會要皆無之今據

補國史

河南河北大蝗田稼食盡鎮定等州尤甚野草樹葉細枝

亦盡

己開成四年春閏正月己亥裴度至京師以疾歸第

此長安平樂里第也

能入見上勞問賜賚使者劾午三月丙戌薨謚曰文忠上怪度無

遺表問其家得半臺以儲嗣未定爲憂言不及私度字中立歷事

六朝出入將相宏功偉業莫與爲比身貌不踰中人而風彩俊爽

占對雄辯威寧遠達四夷四夷見唐使輒問度年齒幾何貌狀孰似天子用盃以身繫國家輕重如郭子儀者二十餘年初未遇時有相者曰郎君形神不入相書法當餓死他日遊香山寺有一婦人攜一緹繪置于僧伽蘭楯祈祝瞻拜而去竟忘所攜度收取而待之見向者婦人撫膺而至曰阿父無罪被繫昨與人假得玉帶二屨帶一以賂津要不幸遺失老父之命休矣度卽還之婦人泣拜請畱其一度不顧而去相者後復見之大驚曰子必有陰德及物前程萬里不可量也皇甫湜恃才傲物性復褊急分務東洛值歲歉俸薄不支困悴且甚嘗因積雪庖突不烟度時畱守東都乃辟爲從事湜簡率少禮度不以爲嫌度嘗修福先寺將致書於白居易請爲碑文湜在坐發怒曰近捨皇甫湜而遠徵白居易請從

此辭賓佐無不驚慄度婉辭謝之卽以屬湜湜乃請斗酒飲之乘
醉揮毫其文立就思古辭審字復怪僻度尋繹久之不能分其句
旣而歎曰木元虛郭景純之流也命以寶車名馬繒綵器玩約千
餘緡致書贈之湜省書大怒擲之于地謂使者曰寄謝侍中何相
待之薄也某之文非常流之比曾與顧況爲集序外未嘗造次許
人今者請爲之碑蓋受恩深耳其碑約三千字一字三匹絹不爲
多也使者歸具告之僚屬列校咸扼腕不平度獨笑曰真奇才也
立依數酬之自居守府第輦負致其家前後相望洛人聚觀爲之
歎息度不信術數不好服食每語人曰鷄豬魚蒜逢著卽喫生老
病死時至則行其器度宏達皆此類也 夏四月戊辰上稱判度
支杜悰之才楊嗣復李珣因請除悰戶部尙書陳夷行曰恩旨當

由上出自古失其國未始不由權在臣下也珏曰陛下嘗語臣云
人主當擇宰相不當疑宰相五月丁亥上與宰相論政事陳夷行
復言不宜使威福在下李珏曰夷行意疑宰相中有弄陛下威權
者耳臣屢求退苟得王傅臣之幸也王傳散地自宰執以下貶官者居之鄭覃曰陛
下開成元年二年政事殊美三年四年漸不如前楊嗣復曰元年
二年鄭覃夷行用事三年四年臣與李珏同之罪皆在臣因叩頭
曰臣不敢更入中書遂趨出上遣使召還勞之曰鄭覃失言卿何
遽爾覃起謝曰臣愚拙意亦不屬嗣復而遽如是乃嗣復不容臣
耳嗣復曰覃言政事一年不如一年非獨臣應得罪亦上累聖德
退三上表辭位上遣中使召出之癸巳始入朝丙申門下侍郎同
平章事鄭覃罷爲右僕射陳夷行罷爲吏部侍郎覃少清苦貞退

不造次與人款狎位至相國所居未嘗增飾纔蔽風雨家無媵妾人皆仰其素風然疾惡太過夷行亦耿介故嗣復等深疾之上

以鹽鐵推官檢校禮部員外郎姚勛能鞫疑獄命權知職方員外

郎右丞韋溫不聽上奏稱郎官朝廷清選不宜以賞能吏上乃以

勛檢校禮部郎中依前鹽鐵推官

姚勛權知職方員外郎而韋溫爭之檢校禮部郎中而溫不復

言者蓋唐制藩鎮及諸使僚屬率帶檢校官而權知則爲職事官故也

六月丁丑上以其事問宰相

楊嗣復對曰溫志在澄清流品然勛名臣後士行無玷若有吏能

者皆不得清流則天下之事孰爲陛下理之恐似裴晉之風然上

素重溫終不奪其所守溫性孝初由咸陽尉入爲監察御史以父

在田里憲府禮拘難于省謁不拜改授著作郎一謝卽還省父疾

調適湯藥彌二十年衣不解帶服闋乃仕李德裕作相遷禮部員

外郎或言溫與牛僧孺善德裕曰此人堅正中立君子也何害上
嘗欲用爲翰林學士先是其父綬在禁庭積憂畏病廢因戒溫不
得任近職溫乃固辭學士之職上怒曰甯綬治命耶禮部侍郎崔
龜曰溫用亂命所以爲孝上意乃解 上以久旱憂形於色宰臣
等奏曰水旱時數使然不必過勞聖慮上改容言曰朕爲人主無
德及人致茲災旱若三日不雨當退歸南內更選賢明以主天下
耳是夕大雨霑足 秋七月癸未以張元益爲左驍衛將軍以其
母侯莫陳氏爲趙國太夫人賜絹二百匹易定之亂侯莫陳氏說
諭將士且戒元益以順朝命故賞之 甲辰以太常卿崔郾同中
書門下平章事郾郾之弟也 滄景淄青大水 八月辛亥郾王
懷琬懷憲宗子卒未夜流星出羽林尾長八丈餘滅後有聲如雷壬

申鎮冀四州蝗食稼野草樹葉皆盡 癸酉昭義節度使劉從諫

上言蕭本詐稱太后弟上下皆稱蕭宏是真以本來自左軍故宏

爲臺司所抑今宏詣臣求臣上聞乞追宏赴闕與本對推以正真

僞詔三司鞠之 冬十月乙卯上就起居舍人魏謩取記注觀之

記注卽起居注貞觀初以給事中諫議大夫兼知起居注或卽起居事每仗下議記事起居耶一人執筆記錄于前史官隨之其後復置起居舍人分侍左右秉筆隨宰相入殿若仗在紫宸內閣則夾香案分立殿下直第二轉首和墨濡筆皆卽勅處時號轉頭高宗臨朝不快事有所奏惟辭見而已許敬宗李義府爲相奏請多畏人之知也命起居耶舍人對仗承旨仗下與百官皆出不敢聞機務矣長壽中宰相姚崇建議仗下後宰相一人錄軍國政要爲時政記月送史館然率推美讓善事非其實未幾亦罷而起居耶因制數稍稍筆削以廣國史之闕起居舍人本記言之職惟編纂書不及他事開元初復詔修史官非供奉者皆隨仗而入位予起居耶耶舍人之次及李林甫專權又廢太和九年詔起起居耶舍人凡入閣日具紙筆立靖殿下復貞觀故事 謩不可曰記注兼善善惡所以儆戒人君陛下但力爲善不必觀史上曰朕獨

嘗觀之對曰此懸日史官之罪也若陛下自觀史則史官必有所

諱避何以取信於後上乃止 楊妃請立皇弟安王溶為嗣上謀

於宰相李瑋非之丙寅立敬宗少子陳王成美為皇太子

為楊妃及成美

見張本丁卯上幸會甯殿作樂有童子緣橦一夫來往走其下如狂

上怪之左右曰其父也上泣然流涕曰朕貴為天子不能全一子

召教坊劉楚材等四人宮人張十十等十人責之曰構會太子皆

爾曹也今更立太子復欲爾耶執以付吏己已皆殺之上因是感

傷舊疾遂增 十一月三司按蕭本蕭宏皆非真太后弟本除名

流愛州宏流儋州

愛州漢九真郡置愛州至京師八千八百里

而太后真弟在閩中終

不能自達 十二月乙卯乾陵寢宮火 乙亥上疾少間坐思政

殿召當直學士周墀賜之酒因問曰朕可方前代何主對曰陛下

黃治通鑑補卷二百四十六 唐紀六十二 九

堯舜之主也上曰朕豈敢比堯舜所以問卿者何如周赧漢獻耳

堯舜曰彼亡國之主豈可比聖德上曰赧獻受制於彊諸侯今朕

受制於家奴以此言之朕殆不如因泣下霑襟堯舜伏地流涕自是

不復視朝

考異曰高彥休唐史曰文宗開成後常鬱鬱不樂五年春風痹稍開坐思政殿問周堯云云既而龍姿掩抑

疾落衣襟

汝南公俯伏鳴咽再拜而退自是不復視朝以至厭代

按寶錄明年正月朔上不康不受朝賀四日帝崩恐非五年春今

從新傳仍

是歲天下戶口四百九十九萬六千七百五十二

置於此

回鶻相安允合特勒柴革謀作亂影信可汗殺之相掘羅勿將兵

在外以馬三百賂沙陁朱耶赤心借其兵共攻可汗可汗兵敗自

殺國人立廬駭特勒為可汗

考異曰後唐獻祖紀年錄曰開成四年回鶻大饑族帳離復為黠戛斯所

逼漸渴頃口至於榆林天德軍使溫德彝請帝為援遂帥騎赴之

時胡特勒可汗可帳在近帝遣使說回鶻相噶沒斯為陳利害云

云噶沒斯然之決有歸國之約俄而回鶻宰相勿篤公叛可汗將

圖歸義遣人獻其馬三百以求應接帝自天德引軍至磧口援之

爲回鶻所薄帝一戰敗之進擊可汗牙帳胡特勒可汗勢窮自殺
回昌因奏勿篤公爲署親可汗是歲開成五年也文宗崩武宗卽
位遣嗣澤王溶告哀於回鶻使還始知特勒可汗易代按朱邪未
心若奏勿篤公爲可汗安得因溶告哀始知易代乎此則自相違
矣舊傳開成初其相有安允合者與特勒榮革欲篡特勒可汗
可汗覺殺薩革及安允合又有回鶻相攝羅勿者擁兵在外怨誅
榮革安允合又殺薩特勒可汗以盧殺特勒爲可汗新傳云開成
四年其相攝羅勿作難引沙陀共攻可汗可汗自殺國人立廬駟
特勒爲可汗今從之○會歲疫大雪羊馬多死回鶻遂衰赤心執
廬音磁駟音羅入聲

宜之子也

庚開成五年春正月己卯上疾甚命知樞密劉宏逸薛季校引楊
嗣復李珣至禁中欲奉太子監國中尉仇士良魚宏志以太子之
立功不在己乃言太子幼且有疾更議所立李珣曰太子位已定
豈得中變士良宏志遂寢詔立穎王瀛爲皇太弟應軍國事權令
旬當太子成美年尙冲幼未漸師資可復封陳王

考異曰唐開史
曰武宗皇帝王

夫人者燕道倡女也武宗爲穎王獲愛幸文宗於十六宅西別建
安王溶穎王曜院上數幸其中縱酒如家人禮及文宗晏駕後宮
無子所立敬宗男陳王年幼且病未任軍國事中實主禁掖者以
安王大行親戚既賢且長遂起左右神策軍及飛龍羽林騎數
千眾卽藩邸奉迎安王中貴遂呼曰迎大者迎大者如是者數四
意以安王爲兄卽大者也及兵仗至二王宅首兵士相語曰奉命
迎大者不知安穎孰爲大者王夫人竊聞之擁髻蹙眉走出燭言
曰大者穎王也大家左右以正魁梧頤頤長皆呼爲大王且與中尉
有死生之契汝曹或誤必赤族矣時安王少云其次第合立志少
疑懦懼未敢出穎王神氣抑揚隱于屏間夫人自後縱出之眾咸
其語遂扶上馬戈甲霜耀前至少陽院諸中貴知已議無敢出言
者遂羅拜馬前連呼萬歲尋下詔以穎王立爲皇太子弟權句當
軍國事新后妃傳曰武宗賢妃王氏開成末王嗣帝位妃爲助
肅故進才人蓋亦取於閭史也按立嗣大事豈容繆誤史雖
信今不取從文

宗武宗實錄

是日十良宏志將兵詣十六宅迎穎王至少陽院

百官謁見於思賢殿瀛沈殺有斷喜慍不形於色與安王溶皆素

爲上所厚異於諸王辛巳上崩于太和殿

年三十三

以楊嗣復攝冢宰

癸未仇士良說太弟楊賢妃安王溶陳王成美死

考異曰舊傳曰安王溶穆

宗第八子母楊賢妃武宗卽位李德裕秉政或告文宗崩時楊賢妃復以與賢妃宗家欲立安王爲副故王受禍嗣復貶官按是時德裕未入相今敕大行以十四日殯成服諫議大夫裴夷直上言期從武宗實錄

日太遠不聽時仇士良等追怨文宗

以甘露之事也

凡樂工及內侍得幸

於文宗者誅貶相繼夷直復上言陛下自藩維繼統是宜儼然在

疚

記檀弓秦穆公弔公子重耳曰儼然在憂服之中詩問予小子履罔在疚注疚病也在憂病之中

以哀慕爲心

速行喪禮早議大政以慰天下而未及數日屢誅戮先帝近臣驚

率土之視聽傷先帝之神靈人情何瞻國體至重若使此輩無罪

固不可刑若其有罪彼已在天網之內無所逃伏旬日之外行之

何晚不聽辛卯始大斂天弟卽位甲午追尊上母韋妃爲皇太后

二月乙卯赦天下

丙寅謚韋太后曰宣懿

封右軍中尉仇

士良爲楚國公左軍中尉魚宏志爲韓國公

夏五月己卯門下

文宗開成五年

侍郎同平章事楊嗣復罷爲吏部尙書以刑部尙書崔珙同平章事兼鹽鐵轉運使 六月丙寅以旱避正殿理因河北河南淮南浙東福建蝗疫免其徭 秋八月壬戌葬元聖昭獻孝皇帝于章

陵

章陵在京兆富平縣西北二十里

廟號文宗

更臣曰昭獻皇帝恭儉儒雅出於自然性仁孝尤勤于政治凡遇內外羣官必面訊其行能然後補衢州刺史張賈好博帝謂之曰聞卿善長行對曰政事之餘聊與賓客爲戲非有所妨帝曰豈有好之而無妨也內外聞之悚息帝以累世變起禁闢故欲盡除中官然謀非其人制御無術幾致顛危所謂有帝王之道而無帝王之才雖吁食焦憂不能弭患惜哉

庚午門下侍郎同平章事李珣坐爲山陵使龍輅陷

記天子龍輅輅載板車也

書罷爲太常卿貶京兆尹敬昕爲郴州司馬 義武軍亂逐節
度使陳君實君實募勇士數百人復入軍城誅亂者 初上之立
非宰相意故楊嗣復李珣相繼罷去召淮南節度使李德裕入朝
九月甲戌朔至京師丁丑以德裕爲門下侍郎同平章事庚辰德
裕入謝言於上曰致理之要在於辨羣臣之邪正夫邪正二者勢
不相容正人指邪人爲邪邪人亦指正人爲邪人主辯之甚難臣
以爲正人如松柏特立不倚邪人如藤蘿非附他物不能自起故
正人一心事君而邪人競爲朋黨先帝深知朋黨之患然所用卒
皆朋黨之人良由執心不定故奸人得乘間而入也夫宰相不能
人人忠良或爲欺罔主心始疑於是旁詢小臣以察執政如德宗
末年所聽任者惟裴延齡輩宰相署敕而已此政事所以日亂也

陛下誠能慎擇賢才以爲宰相有奸罔者立黜去常令政事皆出中書推心委任堅定不移則天下何憂不理哉又曰先帝於大臣好爲形迹小過皆含容不言日累月積以至禍敗茲事大誤願陛下以爲戒臣等有罪陛下當面詰之事苟無實得以辯明若其有實辭理自窮小過則容其後改大罪則加之誅譴如此君臣之際無疑閒矣上嘉納之初德裕在淮南敕召監軍楊欽義人皆言必知樞密德裕待之無加禮欽義心銜之一旦獨延欽義置酒中堂情禮極厚陳珍玩數牀罷酒皆以贈之欽義大喜過望行至汴州敕復還淮南欽義盡以所餉歸之德裕曰此何直言此物所直能幾何也卒以與之其後欽義竟知樞密德裕柄用欽義頗有力焉 初伊吾之西焉耆之北有點戛斯部落卽古之堅昆唐初結骨也後更號

黠戛斯

結骨入貢見二百九十八卷太宗貞觀二十二年考異曰李德裕會昌一品集安撫回鶻制作乾吃斯今從會昌伐

新記杜牧集

乾元中爲回鶻所破自是隔閼不通中國其君長曰

阿熱建牙青山去回鶻牙囊駝行四十日

青山在劍河西

其人悍勇吐蕃

回鶻常賂遺之假以官號回鶻既衰阿熱始自稱可汗回鶻遣相

國將兵擊之連兵二十餘年數爲黠戛斯所敗阿熱恃勝嘗回鶻

曰爾運盡矣我必取爾金帳於爾帳前馳我馬植我旗金帳者回

鶻可汗所居帳也及掘羅勿殺彰信立盛馭回鶻別將句錄其賀

引黠戛斯十萬騎攻回鶻大破之殺盛馭及掘羅勿焚其牙帳蕩

盡回鶻諸部逃散其相馭職與應特勒等十五部西奔葛邏祿一

支奔吐蕃一支奔安西可汗兄弟盟沒斯等

盟音鴿又音乞

及其相赤心

僕固特勒那頡頏各帥其眾抵天德塞下就雜虜貿易穀食且求

丙附冬十月丙辰天德軍使溫德彝奏回鶻潰兵侵逼西城

西城朔方

西安降

互六十里不見其後邊人以回鶻猥至恐懼不安詔振武

節度使劉沔屯雲伽關以備之

新志軍于府有雲伽關振武節度治軍于府

魏博節

度使何進滔斃軍中推其子都知兵馬使重順知畱後

蕭太后

徙居興慶宮積慶殿號積慶太后十一月癸酉朔上幸雲陽校

獵故事新天子卽位兩省官同署名上之卽位也諫議大夫裴

夷直漏名由是出爲杭州刺史

考異曰新傳曰武宗立夷直視牒冊不肖署今從武宗實錄

開府儀同三司左衛上將軍兼內謁者監仇士良請以開府蔭其

子爲千牛給事中李中敏判曰開府階誠立蔭子

唐制從五品以上皆得蔭子開

府從一品

立得蔭子謁者監何由有兒士良慙恚李德裕亦以中敏爲楊嗣

復之讎惡之出爲婺州刺史

婺州春秋越之西界漢爲會稽郡烏傷縣地吳置東陽郡陳置縉州隋平

陳爲吳州又以其地於天
文爲妻女之分改發州 甲敏性剛峭遇事敢言與進士杜牧李

甘相善文章趣向大宰相類 十二月庚申以何重順知魏博留

後事 立皇子峻爲杞王

武宗至道昭肅孝皇帝 諱溫穆宗第五子 在位六年改元一

至會昌元年春正月己卯上朝獻太清宮庚辰朝享太廟辛巳祀

圓丘赦天下改元 劉沔奏回鶻已退詔沔還鎮 二月回鶻十

三部近牙帳者立烏希特勒爲烏介可汗南保錯子山 新志謂犯

入磧經廣鹿山鹿耳山至錯甲山據李德裕言錯子山東距經迦

泊三百里考異曰據伐叛記烏介立在二月今從之後唐獻祖紫

年錄曰王子烏希特勒者昆薩之弟胡特勒之叔爲黠戛斯所迫

帥眾來歸至錯子山乃自立爲可汗二年七月賜爲烏介可汗

賜音辟鵝音

提又音梯 三月甲戌以御史大夫陳夷行爲門下侍郎同平

章事 初知樞密劉宏遠辭季校有寵於文宗仇士良惡之上之

立非二人及宰相意故楊嗣復出爲湖南觀察使李珣出爲桂管

觀察使士良屢譖宏逸等於上勸上除之乙未賜宏逸季棧死遣

中使就潭桂州誅嗣復及珣

湖南觀察使治潭州桂管觀察使治桂州潭州古長沙郡京師南二千四

百四十五里乘取陸梁地爲桂林郡吳於桂林置始安郡梁置桂州至京師水陸路四千七百六十里

戶部尙書杜

棕奔馬見李德裕曰天子年少新卽位茲事不宜手滑丙申德裕

與崔瑛崔鄆陳夷行三上奏又邀樞密使至中書使入奏以爲德

宗疑劉晏動搖東宮而殺之中外咸以爲冤兩河不臣者由茲恐

懼得以爲辭德宗後悔錄其子孫文宗疑宋申錫交通藩邸京謫

至死旣而追悔爲之出涕嗣復珣等若有罪惡乞更加重貶必不

可容亦當先行訊鞠俟罪狀著白誅之未晚今不謀於臣等遽遣

使誅之人情莫不震駭願開延英賜對至晡時開延英召德裕等

入德裕等泣涕極言陛下宜重慎此舉毋致後悔上曰朕不悔三
命之坐德裕等曰臣等願陛下免二人於死勿使既死而眾以爲
冤今未奉聖旨臣等不敢坐久之上乃曰特爲卿等釋之德裕等
躍下階舞蹈上召升坐歎曰朕嗣位之際宰相何嘗比數李珣季
梭志在陳王嗣復宏逸志在安王陳王猶是文宗遺意安王則專
附楊妃嗣復仍與妃書云姑何不效則天臨朝歸使安王得志朕
那復有今日德裕等曰茲事曖昧虛實難知上曰楊妃嘗有疾文
宗聽其弟元思入侍月餘以此得通指意朕細詢內人情狀皎然
非虛也遂追還二使更貶嗣復爲潮州刺史李珣爲昭州刺史

昭州

至京師四千四

裴夷直爲驩州司戶

考異曰舊紀開成五年八月十七日葬文宗于章陵知樞

密劉宏遠薛季陵率禁軍護靈駕二人素爲文宗獎遇仇士良惡之心不自安因是欲弒士良宏志肅簡使王起山陵使崔郾

覺其謀先諭鹵簿諸軍是日宏逸季稜伏誅以楊嗣復爲湖南觀察使李珣爲村管觀察使中丞裴夷直爲杭州刺史皆坐宏逸季稜也賈緯唐年補錄曰五年八月云是月誅樞密使劉宏逸薛季稜希卽位尤忌宦官季稜宏逸深懼之及將葬文宗於章陵聚禁兵欲誅廢立賴山陵使崔郾鹵簿使王起拒而獲濟遂擒宏逸季稜殺之舊王起傳八月充山陵鹵簿使樞密使劉宏逸薛季稜懼許滋因山陵兵士謀廢立起與山陵使知其謀密奏皆食誅舊嗣復傳五年九月貶湖南明年誅季稜宏逸中人言二人頃附嗣復李珣不利於陛下武宗性急立命中使往湖南桂管殺嗣復與珣按去年八月若已誅宏逸季稜不當至此月始再貶嗣復等舊紀王起傳與嗣復傳自相違今從實錄實錄又曰時有再以其事勸帝意者帝赫怒欲殺之中使既發雖宰相亦不知之戶部尙書判度支杜棕奔馬見德裕云云舊嗣復傳曰宰相崔瑋崔瑒等亟請開延英極言云云獻曆記曰會昌元年三月二十四日遇假在宅向晚聞有中使一人向東一人向南處置二故相及裴夷直余遣人問鹽鐵崔瑋相度支杜尙書京兆盧尹皆云聞有使去不知其故余遂草約奏狀二十五日早人中書崔瑋相琪續至崔瑋次至陳相最後至已巳時矣余令三相會食自歸廳寫狀請開延英賜對進狀後更無報答至午又自寫第二狀封進兼請得樞密使至中書問有此事無樞密使對曰向者不敢言相公既知只是二人嗣復李珣德裕言此事至重陛下都不訪問便遣使去物情無不驚懼請附德裕奏聖旨若疑德裕情故請先自遣貶惟此一事不可更

行德裕等至夜不敢離中書請早開延英賜對至申時報開延英殿余邀得丞相兩省官謂曰上性剛若有一人進狀伏問必不捨笑容德裕極力救解繼以叩頭流血德裕救不得他人固不可矣及召入延英德裕率三相公立誓御榻奏事鳴咽流涕云云上既捨之又令德裕召丞郎兩省官官示今從實錄亦采獻替記夏六月乙巳詔自今臣下論人

罪惡竝應請付御史臺按問毋得乞畱中以杜讒邪以魏博畱

後何重順爲節度使上命道士趙歸真於三殿建九天道場親

受法錄右拾遺王哲上疏切諫坐貶河南府士曹

考異曰實錄道士趙歸真等八

十一人於三殿建九天道場帝親傳法錄右拾遺王哲上疏請不度進士明經爲道士不從又上書諫求仙事詞甚切直貶河南府士曹參軍舊紀以衡山道士劉元靜爲崇元館學士令與道士趙歸真於禁中修法錄左補闕劉彥諷切諫貶彥諷河南府戶曹實錄去年九月已命歸真建道場親受法錄哲疏言王業之始不立崇信過篤至此又有此事與舊紀劉彥諷事相類今從實錄

秋八月加仇士良觀軍容使天德軍使田牟監軍韋仲平欲擊

回鶻以求功奏稱回鶻叛將噶沒斯等侵逼塞下吐谷渾沙陀党

項皆世與爲仇請自出兵驅逐上命朝臣議之議者皆以爲盭沒
斯叛可汗而來不可受宜如牟等所請擊之便上以問宰相李德
裕以爲窮鳥入懷猶當活之況回鶻屢建大功今爲鄰國所破部
落離散窮無所歸遠依天子無秋毫犯塞奈何乘其困而擊之宜
遣使者鎮撫運糧食以賜之此漢宣帝所以服呼韓耶也

呼韓耶事見二

十七卷廿陳夷行曰此所謂借寇兵資盜糧也不如擊之德裕曰

露三年彼吐谷渾等各有部落見利則銳敏爭進不利則鳥驚魚散各走
巢穴安可守死爲國家用今天德城兵纔千餘若戰不利城陷必
矣不若以恩義撫而安之必不爲患縱使侵暴邊境亦須徵諸道
大兵討之豈可獨使天德擊之乎時詔以鴻臚卿張賈爲巡邊使
使察回鶻情僞

考異曰一品集賜盭沒斯等詔曰天德軍通至賈所奏表又曰方圖鎮撫已命使臣又知堅昆等五

族深入陵虐可汗破害公主及新可汗播越他所特勸等相率遁
逃葛里賀命又曰豈非欲討除外寇匡復本蕃又曰但緣未知指
的難使罷從又曰又慮邊境守臣或懷疑沮又曰故遣張賈往安撫又曰秋熟然則詔下必在此際也未還上問德

裕曰噁沒斯等請降可保信乎對曰朝中之人臣不敢保況敢保
數千里外戎狄之心乎然謂之叛將則恐不可若可汗在國噁沒
斯等帥眾而來則於體固不可受今聞其國敗亂無主將相逃散
或奔吐蕃或奔葛邏祿惟此一支遠依大國觀其表辭危迫懇切
豈可謂之叛將乎況噁沒斯等自去年九月至天德今年三月始
立烏介自無君臣之分願且詔河東振武嚴兵保境以備之俟其
攻犯城鎮然後以武力驅除或於吐谷渾等部中少有抄掠聽自
讎報亦未可助以官軍仍詔田牟仲平毋得邀功生事常令不失
大信懷柔得宜彼雖戎狄必知感恩辛酉詔田牟約勒將士及雜

虜毋得先犯回鶻

考異曰舊紀八月烏介遣使告故可汗死部人推爲可汗今奉公主南投大國時烏介至塞上

盟沒斯與赤心相攻殺赤心率數千帳近西城田牟以聞烏介又令其相頡千迦斯表借天養城仍乞糧餉牛羊詔王會李師德往宣慰令放公主入朝賑粟二萬石舊德裕傳曰開成末回鶻爲點戛斯所破部族離散烏介奉太和公主南來會昌二年二月牙於塞上遣使求助兵糧收復本國權借天德軍田牟請以沙陀退渾諸部聲之下百寮議議者多云如牟之奏德裕云云帝以爲然許借米三萬石伐鐵記曰會昌元年二月回鶻遠涉沙漠飢餓尤甚將金寶於塞上部落博羅糧食邊人貪其財寶生懷奪之心至其年秋以使田牟監軍韋仲平上表稱退渾党項與回鶻宿有嫌怨願出本部兵馬驅逐其時天德城內只有將士一千人戰事又居其半上令幸臣商量德裕而奏云云八月二十四日請賜田牟仲平詔漢兵及蕃渾不得先犯回鶻語在會要集奏狀中按舊紀實錄皆未集眾書爲之事前後多差互今從伐叛記一品集

之牟布之弟也

癸巳盧龍軍亂殺節度使史元忠推陳行泰主

留務

李德裕請遣使慰撫回鶻且運糧三萬斛以賜之上以爲

疑閏月己亥開延英召宰相議之陳夷行於候對之所屢言資盜

糧不可德裕曰今徵兵未集天德孤危倘不以此糧救飢虜且使

安靜萬一天德陷沒咎將誰歸夷行至上前遂不敢言上乃許以

穀二萬斛賑之

考異曰伐叛記云降賜粟米二萬石尋又烏介至天德按實錄十一月朔猶未知公主所在遣苗祺

至盟沒斯處訪問月未始云公主遣使言烏介可汗乞命及降使宣慰十二月庚辰制曰公主遣使入朝已知新立可汗寓居塞下宜令王會慰問月賑米二萬斛然則閏九月中烏介未至天德德裕但欲賑盟沒斯等耳上雖許賜米而未遣使會問烏介在塞下因遣王會賜之二萬斛耳非再賜也伐叛記終言其事非以閏九月中即降使賜米也以前山南東道節

度使同平章事牛僧孺為太子太師先是漢水溢壞襄州民居故

李德裕以為僧孺罪而廢之

廢之者使居散地也

盧龍軍復亂殺陳行泰

立牙將張絳

考異曰舊紀十月幽州雄武軍使張絳遣軍吏吳仲舒入朝言行泰慘虐請以鎮軍加討許之是月誅行

泰遂以祥知兵馬事二年正月以祥知蜀後仍賜名仲武以兩人為一人誤也今從舊仲武傳伐叛傳實錄初陳行泰

逐史元忠遣監軍廉

監軍像監軍之儼從也

以軍中大將表來求節鉞李德

裕曰河朔事勢臣所熟諳比來朝廷遣使賜詔常太速故軍情遂

固若置之數月不問必自生變今請畱監軍兼勿遣使以觀之既

而軍中果殺行竊立張絳復求節鉞朝廷亦不問會雄武軍使張

仲武起兵擊絳

雄武軍在薊州廣漢川

且遣軍吏吳仲舒奉表詣京師稱絳

慘虐請以本軍討之冬十月仲舒至京師詔宰相問狀仲舒言行

泰絳皆遊客至軍故人心不附仲武幽州舊將張光朝之子性忠

義通書習戎事人心嚮之邇者張絳初殺行泰召仲武欲以畱務

讓之牙中一二百人不可仲武行至昌平絳復卻之今計仲武纔

發雄武軍中已逐絳矣李德裕問雄武士卒幾何對曰軍士八百

外有土團五百人

團結土人為兵故謂之土團

德裕曰兵少何以立功對曰在

得人心苟人心不從兵三萬何益德裕又問萬一不克如何對曰

幽州糧食皆在媯州及北邊七鎮

媯州南至幽州二百九十里東至媯州二百五十里檀州有大

王北來係要鹿固赤

城邀虜石子亂七鎮萬一未能入則據居庸關

幽州昌平縣軍都陜西北三十五里

有納款開即居庸故關亦謂之軍都關

絕其糧道幽州自困矣德

裕奏行泰絳皆使大將上表脇朝廷邀節鉞故不可與今仲武先

自表請發兵爲朝廷討亂與之則似有名乃以仲武知盧龍畱後

仲武尋克幽州

上校獵咸陽

十一月李德裕上言今回鶻破

亡太和公主未知所在若不遣使訪問則戎狄必謂國家降主虜

庭本非愛惜既負公主又傷虜情請遣通事舍人苗繼齋詔詣盟

沒斯令轉達公主兼可卜盟沒斯逆順之情從之上頗好田獵

及武戲

武戲謂毬鞠騎射手搏等

五坊小兒得出入禁中賞賜甚厚嘗謁郭太

后

郭太后憲宗妃於上爲祖母時居興慶宮

從容請曰如何可爲盛天子太后曰諫臣

章疏宜審覽度可用用之有不可以詢宰相毋拒直言勿納偏言
以忠良爲腹心此盛天子也上退悉取諫疏閱之多諫遊獵自是
上出畋稍稀五坊無復橫賜 壬寅夜大星東北流其光燭地有
聲如雷山崩石隕 辛亥以彗星見避正殿減膳理繫囚罷興作

癸亥以中書侍郎同平章事崔郾同平章事充西川節度使

初黠戛斯既破回鶻得太和公主自謂李陵之後

唐書曰黠戛斯人皆長大赤髮

皙面綠瞳以黑髮者爲不祥

黑瞳者必曰李陵苗裔也 與唐同姓遣達干十人奉公主歸之

於唐回鶻烏介可汗引兵邀擊達干盡殺之質公主南度磧屯天

德軍境上

天德軍境北至磧口三百里

公主遣使上表言可汗已立求冊命烏

介又使其相頡干迦斯等上表借振武一城以居公主可汗

考異曰新

傳曰達干奉主來歸烏介擊擊達干殺之南度磧進攻天德城劉
訥屯雲伽開拒卻之按烏介力倚唐爲援豈敢攻天德今從舊紀

傳實錄十二月庚辰制遣右金吾大將軍王會等慰問回鶻仍賑米二萬斛又賜烏介可汗敕書諭以宣帥部眾漸復舊疆漂寓塞垣殊非良計又云欲借振武一城前代未有此比或欲別遷善地求大國聲援亦須於漠南駐止朕當許公主入覲親問事宜儻須應接必無所吝

延會昌二年春正月以張仲武爲盧龍節度使 朝廷以回鶻屯

天德振武北境以兵部郎中李拭爲巡邊使察將帥能否拭鄜之

子也

李鄜見二百四十卷元和十二年

宋毫二州地震 二月淮南節度使李

紳入朝丁丑以紳爲中書侍郎同平章事判度支 河東節度使

符澈修杷頭烽舊戍以備回鶻

杷頭烽北臨大嶺東望雲朔西望振武

李德裕奏請

增兵鎮守及修東中二受降城以壯天德形勢從之 右散騎常

侍柳公權素與李德裕善崔瑛奏爲集賢學士判院事

元宗開元十三年改

重正修書院爲集賢殿書院五品以上爲學士六品以下爲直學士宰相一人爲學士知院事常侍一人爲副知院事又置判院一人押院中使一人元和四年集賢殿書院學士直學士皆用五品如開元故事以學士一人年高者判院事

德裕以恩非己出因事左遷公權爲太子詹事

回鶻復奏求糧及尋勘吐

谷渾党項所掠又借振武城詔遣內使楊觀賜可汗書諭以城不

可借餘當應接處置三月戊申李拭巡邊還稱振武節度使劉沔

有威略可任大事時河東節度使苻澈疾病

疾甚日病

庚申以沔代之

以金吾上將軍李忠順爲振武節度使遣將作少監苗緝冊命烏

介可汗使徐行駐於河東俟可汗位定然後進旣而可汗嬖侵擾

邊境緝竟不行回鶻盟沒斯以赤心桀黠難知先告田牟云赤

心謀犯塞乃誘赤心并僕固殺之那頡吸收赤心之眾七千帳東

走考異曰伐叛記曰赤心宰相欲謀犯塞盟沒斯先布誠于田牟
然後誘赤心同謁可汗戮於可汗帳下赤心所領兵馬遂潰散
東去歸投南州一品集幽州紀聖功碑赤心估力負氣潛圖隋
爲盟沒斯所給誘以俱謁可汗戮於帳下其眾大潰東遁遇弱
傳曰回鶻相赤心者與達位相姓僕固者與特那頡頏雖都眾不
實介介赤心欲犯塞烏介遣其屬盟沒斯先布誠於田牟然後誘
赤心同謁烏介戮赤心於可汗帳下并僕固二人那頡頏勝全占
赤心下七千帳東瞰振武大同懷室韋黑沙榆林東南入幽州雄
武軍西北界新傳曰盟沒斯以赤心姦策難得要領卽密約田牟
誘赤心斬帳下按一品集賜可汗敕書雖云去歲盟沒斯已至近
界今可汗旣立彼又降附然賜可汗書意又云盟沒斯自本國破
之初奔避先至塞上不隨可汗公主已是二年是則盟沒斯自有
部眾雖遙降烏介身未嘗往也安得斬赤心僕固於帳下乎且赤
心若不賣烏介又安可隨盟沒斯同謁烏介乎蓋盟沒斯自惡赤
心桀點誘至己之帳下而殺之耳今從新傳又伐叛記盟沒斯殺
赤心於烏介至天德下連言之舊傳亦然新傳在召諸道兵討烏
介下按一品集據回鶻到橫水欄未知是那頡頏特下爲復是可汗
遣來蓋那頡頏特下脫勒字卽那頡頏也然則虜犯橫水在赤心死
後故置河東奏回鶻兵至橫水考異曰實錄符澈奏回鶻掠橫水
於此

此狀云宜密詔劉河忠順則狀必在李忠順鎮振武之後也殺掠
蓋徵在太原時奏之河除河東後德裕方有此奏故置於此

兵民今退屯釋迦泊東李德裕上言釋迦泊西距可汗帳三百里

烏介時移帳
係錯子山

未知此兵爲那頡所部爲可汗遣來立且指此兵云

不受可汗指揮擅掠邊鄙密詔劉沔張仲武先經略此兵如可以

討逐事亦有名權此一支可汗必自知懼 夏四月庚辰天德都

防禦使田牟奏回鶻侵擾不已不俟朝旨已出兵三千拒之壬午

李德裕奏田牟殊不知兵戎狄長於野戰短於攻城牟但應堅守

以待諸道兵集今全軍出戰萬一失利城中空虛何以自固望急

遣中使止之如已交鋒卽詔雲朔天德以來羌渾各出兵奮擊回

鶻凡所虜獲竝令自取回鶻驕旅二年糧食乏絕人心易動宜詔

田牟招誘降者給糧轉致太原不可留於天德嗾沒斯情僞雖未

可知然要早加官賞

考異曰一品集異域歸忠傳序云二年四月
甲申回鶻大特勒盟沒斯率其國特勒宰相

等內附而此四月十八日狀已言盟沒斯送款蓋盟沒斯自欲誅赤心之時已送款於田牟至二十日乃歸果至天德耳故其後左金吾大將軍劉云盟款減布于邊將尋執反虜不遺君親嚴其能降之徒會麻秋毫之犯旋觀所屬大節甚明蓋聞亂亡盟沒斯本與赤心等來歸唐而邊吏疑阻故赤心等怒欲犯塞而盟沒斯先告邊吏諒赤心之風東走而盟沒斯歸其果降唐縱使不誠亦足爲反間且欲獎其忠義爲討伐之名令遠近諸蕃知但實可汗犯順非欲盡滅回鶻石雄善戰無敵請以爲天德都團練副使佐田牟用兵上皆從其言初太和中河西党項擾邊文宗召石雄於白州雄流白州見二百四十四卷太和三年隸振武軍爲裨將屢立戰功以王智興故未甚進擢至是德裕舉用之甲申盟沒斯帥其國特勒宰相等二千二百餘人來降上信任李德裕觀軍容使仇士良惡之會上將受尊號御丹鳳樓宣赦或告士良宰相與度支議草制減禁軍衣糧及馬芻粟士良揚言於眾曰如此至日軍士必於

樓前諠譁德裕聞之乙酉乞開延英自訴上怒遽遣中使宣諭兩
軍赦書初無此事且赦書皆出朕意非由宰相爾安得此言士良
乃惶愧稱謝丁亥羣臣上尊號曰仁聖文武至神大孝皇帝赦天
下 五月戊申遣鴻臚卿張賈安撫盟沒斯等以盟沒斯爲左金
吾大將軍懷化郡王其次會長官賞有差賜其部眾米五千斛絹
三千匹那頡頏帥其眾自振武大同東因室韋黑沙南趣雄武軍
窺幽州盧龍節度使張仲武遣其弟仲至將兵三萬迎擊大破之
斬首捕虜不可勝計悉收降其七千帳分配諸道那頡頏走烏介
可汗獲而殺之 考異曰伐叛記曰仲武招降赤心下潰兵及可汗
下部落前後三萬餘人分配諸道那頡頏族遂至
窺弱新舊紀皆無仲武破回鶻事舊回鶻傳曰仲武大破那頡之
眾全收七千帳殺戮收擒老小其力萬人那頡中箭透耽羣潰脫
烏介獲而殺之一品集幽州紀聖功碑曰公前後受降三萬人特
勅二人可并姊一人大都督外宰相四人其他裨王騎將不可備

載諸書皆不言仲武破
耶頡曷月日故附於此時烏介眾雖衰滅尙號十萬駐牙於大同

軍北閭門山楊觀自回鶻還可汗表求糧食牛羊且請執送盟沒

斯等詔報以糧食聽自以馬價於振武糴三千石

回鶻自肅宗以來以馬與中國

互市隨其值而償其價牛稼穡之資中國禁人屠宰羊中國所鮮出於北邊

雜虜國家未嘗科調盟沒斯自本國初破先投塞下不隨可汗已

及二年慮彼猜嫌

彼謂烏介

窮迫歸命前可汗正以猜虐無親致內離

外叛今可汗失地遠客尤宜深矯前非若復骨肉相殘則可汗左

右信臣誰敢自保朕務在兼愛已受其降

謂受盟沒斯降也

於可汗不失

恩慈於朝廷免虧信義豈不兩全事體深叶良圖

盟沒斯入朝

六月甲申以盟沒斯所部爲歸義軍以盟沒斯爲左金吾大將軍

充軍使 門下侍郎同平章事陳夷行罷爲左僕射秋七月以尙

資治通鑑補遺卷二百四十六 唐紀六十一 十一 思補遺

書右丞李讓夷爲中書侍郎同平章事 嵐州人田滿川據州城

作亂劉沔討誅之 嗚沒斯請置家太原與諸弟竭力扞邊詔劉

沔存撫其家烏介可汗復遣其相上表借兵助復國又借天德城

詔不許初可汗往來天德振武之間剽掠羌渾又屯杷頭烽北

日杷頭烽在朔州朝廷屢遣使諭之使還漠南可汗不奉詔李德裕以爲

那頡啜屯於山北烏介恐其與奚契丹連謀邀遮故不敢遠離塞

下望敕張仲武諭奚契丹與回鶻共滅那頡啜使得北還及那頡

啜死可汗猶不去議者又以爲回鶻待馬價詔盡以馬價給之又

不去八月可汗帥眾過杷頭烽南突人大同川驅掠河東雜虜牛

馬數萬轉鬪至雲州城門 宋白曰雲州古平城之地北至長城三

領雲中白登二縣又有雲刺史張獻節閉城自守吐谷渾党項皆

內州領柔服雷川二縣

單家入山避之庚午詔發陳許徐汝襄陽等兵屯太原及振武天

德俟來春驅逐回鶻

考異曰實錄六月回鶻寇雲州劉沔出太原兵禦之又云劉沔救雲州為回鶻所敗七月

又云烏介過天德至把頭峰突入大同川驅太原部落牛馬數萬轉戰至雲州新紀正月回鶻寇橫水橋略天德振武軍三月回鶻寇雲州六月劉沔及回鶻戰于雲州敗績按一品集奏回鶻事宜狀臣等見揚觀說緣回鶻赤心下兵馬多散在河北恐與奚契丹室韋同邀截可汗所以未敢遠去今因賜仲武詔令諭以朝旨緣回鶻曾自出效又因殘破歸附國家朝廷事體須有存恤今奚契丹等與其同力討除赤心下散卒遣可汗漸出漠界免有滯留此狀雖無月日約須在揚觀自回鶻還赤心死那顏環未敗前也又賜可汗書云一昨數使卻回皆言可汗只待馬價及令交付之次又聞所止屢遲則是可汗邀求馬價而朝廷於此盡以給之也又七月十九日狀云望賜可汗書得盟沒斯表解在本國之時各有本分馬其馬價絹並合落下請充進奉以可汗本國殘破久在邊陲此已量與盟沒斯優賞其盟沒斯以下本分馬價絹便賜可汗然則給其馬價必在七月十九日前當是時回鶻必未寇雲州敗劉沔突入大同川掠太原牛馬故朝廷曲徇所求欲其早離塞下尤去尚未有攻討之意也又實錄八月壬戌朔李德裕奏請遣石雄斫營取公主掄可汗戊辰又奏斫營事令且住半未詔發陳許徐汝襄陽兵屯太原振武天德救援按一品集德裕論討襄回統

狀云臣頻奉聖旨緣回鶴漸逼把頭烽早須討襲臣比知戎虜不
解攻城只知馬上馳突臣料必無遊弈伏道又不合所管備令石
雄以義武馬軍兼退渾馬騎精選步卒以為羽翼銜枚夜襲必易
成功狀無月日實錄據七日狀云今月一日所商量石雄所管事
望且令住故置之朔日耳此時猶云漸逼把頭烽則是尚未知過
把頭烽南也又八月七日論回鶻事宜狀云回鶻自至把頭烽北
已是數旬奏報寂然更無侵軼察其情狀只與在天德振武界首
不殊臣等今月一日所商量石雄所管事望且令住更濟候事勢
據此狀意則是殊未知可汗深入犯雲州也又八月十日請發陳
許等兵狀云臣等昨日已於延英面奏請太原振武天德各加兵
備備更發陳許徐汝襄陽等兵至河冰合時深處可汗突出遇
河兼與吐蕃連結則為患不細深要防虞其所徵諸道兵恐不可
停須令及冰未合各到所在然則回鶻突入大同川犯雲州必在
八月之初一日七日猶未知九日始奏到故議發兵守備事運實
錄新紀皆誤

丁丑賜盟沒斯與其弟阿歷支習勿吸烏羅思皆姓

李氏名思忠思思義思禮

考異曰舊紀六月盟沒斯等至京師

思忠以回鶻宰相受邪勿為歸義軍副使賜姓名李宏順舊同
傳曰二年冬三年春回鶻七部共三萬眾相次降於幽州詔配諸
道有盟沒斯受邪勿等諸部降服武皆賜國相受邪勿姓愛名宏

并李氏及名思忠思思義今從實錄

國相受邪勿姓愛名宏

順仍以宏順爲歸義軍副使上遣回鶻石戒直還其國賜可汗書

考異曰舊紀此詔在劉沔張仲武爲招討使下按一品集八月十八日狀兩日來臣等竊聞外議云石戒直久在京師事無巨細靡不諮悉昨緣收入鴻臚儀制因求奉使意在脫身又云石戒直先有兩男逃走必是已入回鶻料其此夫豈肯盡心伏望速詔劉沔所在勸還然則遣石戒直賜可汗書必在此狀之前未知後來果會勸回否也諭以自彼國爲紇吃

斯所破結夏斯一名紇吃斯蓋語音相近來投邊境撫納無所不至今可汗尙屯

近塞未議還蕃或侵掠雲朔等州或鈔擊羌渾諸部遙揣深意似

恃姻好之情謂贊大和公主以邀中國每觀蹤由實懷馳突之計中外將相咸

請誅翦朕情深屈己未忍幸災可汗宜速擇良圖無貽後悔上又

命李德裕代劉沔荅回鶻相頡干迦斯書以爲回鶻遠來依投當

效呼韓邪遣子入侍身自入朝及今太和公主入謁太皇太后求

哀乞憐則我之救卹無所愧懷言無所愧於懷也而乃睥睨邊城桀驁自

若邀求過望如在本蕃又深入邊境侵暴不已求援繼好豈宜如是來書又云胡人易動難安若令忿怒不可復制回鶻爲紇吃斯所破舉國將相遺骸棄於草莽累代可汗墳墓隔在天涯回鶻忿怒之心不施於彼而蔑棄仁義逞志中華天地神祇豈容如此昔郅支不事大漢竟自夷滅往事之戒得不在懷戊子李德裕等上言若如前詔河東等三道嚴兵守備三道河東盧龍振武也俟來春驅逐乘回鶻入困馬羸之時又官軍免盛寒之苦則幽州兵宜令止屯本道以俟詔命若慮河冰既合回鶻復有馳突須早驅逐則當及天時未寒決策於數月之間以河朔兵益河東兵必令收功於兩月之內今聞外議紛紜互有異同儻不一詢羣情終爲浮辭所機望令公卿集議詔從之時議者多以爲宜俟來春九月以劉沔兼招

撫回鶻使如須驅逐其諸道行營兵權令指揮以張仲武爲東面

招撫回鶻使其當道行營兵及奚契丹室韋等竝自指揮以李思

忠爲河西党項都將回鶻西南面招討使

此河西謂北河之西

皆會軍于太

原令河屯鴈門關

鴈門關在代州屬門縣卽經崞關

初奚契丹羈屬回鶻各有監

使歲督其貢賦且訶唐事張仲武遣牙將石公緒統二部盡殺回

鶻監使等八百餘人仲武破那頡啜得室韋酋長妻子室韋以金

帛羊馬贖之仲武不受曰但殺回鶻監使則歸之癸卯李德裕等

奏河東奏事官孫儼適至云回鶻移營近南四十里劉沔以爲此

必契丹不與之同恐爲其掩襲故也據此事勢正堪驅除臣等問

孫儼若與幽州合勢追逐回鶻更須益幾兵儼言不須多益兵唯

大同兵少得易定千人助之足矣上皆從之詔河東幽州振武天

德各出大兵移營稍前以迫回鶻上聞太子少傅白居易名欲

相之以問李德裕德裕素惡居易乃言居易衰病不任朝謁其從

父弟左司員外郎敏中辭學不減居易且有器識甲辰以敏中為

翰林學士

為敏中排
德裕張本

李思忠請與契苾沙陀吐谷渾六千騎合

勢擊回鶻乙巳以銀州刺史何清朝蔚州刺史契苾通分將河東

蕃兵詣振武受李思忠指揮通何力之五世孫也

契苾種族太和中附於振武契

苾何力太宗時
來朝遂置兩衛

冬十月丁卯立皇子峴為益王岐為充王

黠

戛斯遣將軍踏布合祖等至天德軍言先遣都呂施合等奉公主

歸之大唐至今無聲問不知得達或為姦人所隔今出兵求索上

天入地期於必得又言將徙就合羅川居回鶻故國

回鶻舊居薛延陀北婁陵

水上去長安七千里開元中倭突厥徙牙烏德
盤山昆河之間南距高麗歷一千七百里

兼已得安西北庭

韃靼等五部落李心傳曰韃靼之先與女真同種韃靼之後也韃靼本出高麗唐滅高麗其遺人逃入勃海惟黑水完疆及勃海盛赫爾皆後為奚契丹所攻部族分散其居混同江之上者曰女真乃黑水遺種也其居陰山者自號為韃靼韃靼之人皆勇悍善戰其近漠地者謂之熟韃靼尙能植稼以平底瓦釜煮而食之其遠者謂之生韃靼以射獵為生無器甲矢貫骨鐵而已余謂李心傳蜀人也安能知直北事特以所傳聞書之○韃音達靼音姐

十一月辛卯朔昭義節度使劉從諫上言請出部兵五千討回鶻詔不許 上遣使賜

太和公主冬衣命李德裕為壽陽公主略曰先朝割愛降婚義甯

家國謂回鶻必能禦侮安靜塞垣今回鶻所為甚不循理每馬首

南向姑得不畏高祖太宗之威靈欲侵擾邊疆豈不思太皇太后

之慈愛為其國母足得指揮若回鶻不能聚命則是棄絕姻好今

日已後不得以姑為詞太和公主憲宗女也於上為姑 上幸涇陽校獵乙卯諫

議大夫高少逸鄭朗於閣中諫曰陛下比來遊獵稍頻出城太遠

侵星夜歸萬幾曠廢上改容謝之少逸等出上謂宰相曰本置諫

官使之論事朕欲時時聞之宰相皆賀己未以少逸爲給事中賈

爲左諫議大夫 劉沔張仲武固稱盛寒未可進兵請待歲首李

忠順獨請與李思忠俱進十二月丙寅李德裕奏請遣思忠進屯

保大柵從之 吐蕃達磨贊普卒丁卯遣其臣論贊熱來告喪

考異

日實錄丁卯吐蕃贊普卒遣使告喪廢朝三日贊普立僅三十餘

年有心疾不知國事委政大臣焉命將作少監李景爲弔祭使據

補國史彙纂卒後又有達磨贊普此年卒者達磨也文宗實錄不

書葬泰贊普李景傳及續會要亦皆無達磨新出據補國史疑文

宗實錄闕略故他書皆因而誤葬泰以元和十一年立至此二十

七年然開成三年已卒達磨立至此五年而實錄云僅三十年亦

是誤以達磨爲葬泰也

命將作少監李璟爲弔祭使

劉沔奏移軍雲州

李忠順奏擊回鶻破之 癸未京師地震 丙戌立皇子嵯爲德

王嵯爲昌王 初吐蕃達磨贊普有佞幸之臣以爲相達磨卒無

子佞相立其妃緄氏兄尙延力之子乞離胡爲贊普纔三歲佞相
與妃共制國事吐蕃老臣數十人皆不得預政事首相結都那見
乞離胡不拜曰贊普宗族甚多而立緄氏子國人誰服其令鬼神
誰饗其祀國必亡矣比年災異之多乃爲此也老夫無權不得正
其亂以報先贊普之德有死而已拔刀斫面慟哭而出佞相殺之
滅其族國人憤怒又不遣使詣唐求冊立落門川討擊使論恐熱

落門川在渭州隴西縣東南漢來獻破隴統於落門卽此考異曰
補國史曰恐熱姓末名騰力吐蕃國法不呼本姓但王族則曰論
官族則曰尙其中字卽蕃號也

性悍忍多詐謀乃屬其徒告之曰

賊擒國族立緄氏專害忠良以脅眾臣且無大唐冊命何名贊普
吾當與汝屬舉義兵入誅緄妃及用事者以正國家天道助順功
無不成遂說三部落得萬騎

三部落吐蕃種落
之分居河隴者

是歲與青海節度

使同盟舉兵自稱國相至渭州遇國相尙恩羅屯薄寒山恐熱擊

之思羅棄輜重西奔松州

王涯曰從龍州青川鎮入吐蕃界直抵故松州之城是吐蕃舊置節度之所

恐熱遂屠渭州思羅發蘇毗吐谷渾羊同等兵合八萬保洮水焚

橋拒之恐熱至隔水語蘇毗等曰賊臣亂國天道我來誅之汝曹

奈何助逆我今已爲宰相國內兵我皆得制之汝不從將滅汝部

落蘇毗等疑不暇恐熱引驍騎涉水蘇毗等皆降思羅西走追獲

殺之恐熱盡併其眾合十餘萬自渭川至松州所過殘滅尸相枕

藉

資治通鑑補卷二百四十六終

資治通鑑補卷第二百四十七

宋涑水司馬光編集

後學天台胡三省音註

明

後學吳郡嚴衍補

後學吳郡談允厚參

唐紀六十三

起三年盡四年七月凡一年有奇

武宗至道昭肅孝皇帝中

懿德三年春正月回鶻烏介可汗帥眾侵逼振武劉沔遣麟州刺史石雄都知兵馬使王逢帥沙陀朱邪赤心三部及契苾拓跋三千騎襲其牙帳拓跋即党項部落也考異曰舊回鶻傳云豐州按是時回鶻為豐州刺史石雄後唐獻祖紀年錄云石州刺史石雄州刺史今從實錄沔自以大軍繼之雄至振武登城望回鶻之眾寡見回鶻車數十乘據車以覆為車屋從者皆衣朱碧類華人使諜問之曰

公主帳也雄使謀告之曰公主至此家也當求歸路今將出兵擊

可汗請公主潛與侍從相保駐車勿動雄乃鑿城爲十餘穴引兵

夜出直政可汗牙帳至其帳下虜乃覺之可汗大驚不知所爲棄

輜重走雄追擊之庚子大破回鶻於殺胡山可汗被瘡與數百騎

遁去雄迎太和公主以歸

考異曰舊石雄傳曰三年回鶻大略雲
朔對河以人原之師屯於雲州河謂雅

日國家以公主之故不欲急攻我輩擇邊但能除患專之可也雄

受教自選勁騎得沙隨部落兼契苾拓跋維虜夜發馬三徑起烏

介之牙時虜帳遁振武雄既入城登樓視其眾寡見輕車數十云

云遂迎公主還太原回鶻傳烏介去幽州八十里下營是夜河東

劉河帥兵奄至烏介驚走東北依柳解至韋下營不及將太和公

主同走石雄兵遇公主帳因迎歸國後唐獻祖紀年錄曰河東帝

爲前鋒回鶻可汗斷牙於殺胡山帝與石雄銜校夜追圍其牙帳
烏介可汗輕騎而遁而於牙帳間見太和公主率而歸國按一品
集會昌二年十月十七日狀訪聞劉河頗疎邊事雖臨機決策不
免遲疑深恐過爲慎重漸失事機望賜訓西詔比緣回鶻未爲侵
擾且務緩懷今既殺戮邊人聖勅牛馬類已有詔速令驅除自度
便宜臨機應變不待過慎疑慮皆待朝廷指揮既假以使名令爲

諸軍節制邊境之事皆以黃成向樓或要移營進軍一切自取機
便不必皆候進止實錄成寅劉河云云如前據德裕此狀則河
豈敢不俟詔旨擅遣石雄襲擊可汗牙帳況已有不須詔之語
也德裕傳德裕日記謂岸北便是沙磧彼中野曠須用騎兵若
以步卒敵之理難必勝今烏介所恃者公主如令勇將出騎奪得
公主虜自敗矣上然之即令德裕草制處分伐叛記曰上問討襲
之計德裕奏若以步兵與回鶻野戰必無勝理回鶻常贊公主同
行臣思得一計料回鶻必未知有所警石雄驍勇無敵若令兼蓄
輝及漢兵銳卒銜枚夜進必取得公主兼可計可擒上從之遂令
石雄領蕃軍及漢兵夜進回鶻果無遊兵伏道直至帳幕方覺遂
取得公主惟可汗輕騎而遁按德裕尋自請擊回鶻營事而斬首萬
石雄於賊止見公主牙帳迎得之非回鶻之策今不取斬首萬
級降其部落二萬餘人丙午劉沔捷奏至 李思忠入朝自以回

鶻降將懼邊將猜忌乞并弟思貞等及愛宏順皆歸闕庭上從之

庚戌以石雄為豐州都防禦使 烏介可汗走保黑車子族

日精之北單于突厥父北黑車子營作車帳其人知孝義也食
無所虛詳考新舊書黑車子即室韋之一種按是時賜點夏斯那
云黑車子去漢界一千餘里考異曰舊回鶻傳云烏介營走東北
約四百里外依和解室韋下營嫁妹與室韋依附之今從伐叛記

實錄新傳傳張仲武傳又云烏介既敗乃依康居求活蓋徒餘種寄託黑車子蓋以李德裕祀聖功碑云烏介并丁令以圖安依康居而求活蓋徒餘種屈意黑車子彼所請康居用鄧文故事耳致此誤也 其潰兵多詣幽州降 二月

庚申朔日有食之 詔停歸義軍以其士卒分隸諸道為騎兵優

給糧賜 辛未黠戛斯遣使者注吾合素獻名馬二新書曰注吾

猛素者左也謂武猛善左射者詔太僕卿趙蕃飲勞之甲戌上引對班在勃海使

之上上欲令趙蕃就頭髮斯求安西北庭李德裕等上言安西去

京師七千餘里北庭五千餘里借使得之當復置都護以唐兵萬

人戍之不知此兵於何處追發饋運從何道得通此乃用實費以

易虛名非計也考異曰德裕傳曰三年二月遣蕃奏黠戛斯攻安

蕃記曰三年二月十一日延英德裕奏九日奉宣令臣等向前書說於黠戛斯處邀求安西北庭深恐不可其下辭亦與此同按實錄辛未注吾合素貽至命趙蕃飲勞之內子中書門下奏九日奉宣其辭亦與前蕃記同不知據何書得此辛未及丙子日也今且

沒其日繁於註者合素入對之下以傳上乃止中書侍郎同平章事崔珙罷爲右

僕射黠戛斯求冊命李德裕奏宜與之結歡令自將兵求殺使

者罪人黠戛斯遣使有送太和公主爲回鶻所殺事見上卷上年及討黑車子上恐加可汗之

名卽不脩臣禮踵回鶻故事求歲遺及寶馬猶豫未決德裕奏黠

戛斯已自稱可汗今欲藉其力恐不可吝此名回鶻有平安史之

功故歲賜絹二萬匹且與之和市黠戛斯未嘗有功於中國豈敢

遽求賂遺乎若慮其不臣當與之約必如回鶻稱臣乃行冊命又

當敘同姓以親之使執子孫之禮上從之庚寅太和公主至京

師改封定安大長公主太和公主以長慶元年歸回鶻至此得還詔宰相帥百官迎謁

於章敬寺前公主詣光順門去盛服脫簪珥謝回鶻負恩和蕃無

狀之罪上遣中使慰諭然後入宮陽安等六公主不來慰問定安

公主各罰俸物及封絹陽安公主順宗之女宋白曰不至者陽安宣城真宗義甯臨真源義昌六公主

賜魏博節度使何重順名宏敬 三月以太僕卿趙蕃爲安撫

黠戛斯使上命李德裕草賜黠戛斯可汗書諭以貞觀二十二年

黠戛斯先君身自入朝授左屯衛將軍堅昆都督迄于天寶朝貢

不絕比爲回鶻所隔回鶻凌虐諸蕃可汗能復雪怨讎茂功壯節

近古無儔今回鶻殘兵不滿千人散投山谷可汗旣與爲怨須盡

殲夷儻留餘燼必生後患又聞可汗受氏之源與我同族孔穎達曰天子

賜姓賜氏諸侯但得賜氏不得賜姓降於天子也故隱公八年左

傳云無駭卒公問族於眾仲眾仲對曰天子建德因生以賜姓昨

之土而命之氏諸侯以字爲諡因氏爲族官有世功則有官族邑

亦如之以此言之天子因諸侯先祖所生賜之曰姓杜預注云若

母生焉則賜姓曰姓封爵之後子陳以所封之土命爲氏齊後姓

焉而氏曰陳故鄭駁異義云炎帝以姜太皞之所賜也黃帝如姬

炎帝之所賜也故堯賜伯夷姓曰姜賜禹姓曰姁賜契姓曰子賜

稷姓曰姬蓋在書傳如鄭此言是天子賜姓也諸侯賜姓大夫

氏若同姓公之子曰公子公子之子曰公孫公孫之子其親已遠
不得上達於公故以王父字爲氏若適夫人之子則以五十字伯
仲爲氏若魯之仲孫季孫是也若庶子妾子則以二十字爲氏若
戚氏展氏是也若異姓則以父祖官及所食之邑爲氏以官爲氏
者則司馬司城是也以邑爲氏者若韓趙魏是也凡賜氏族者此
爲卿乃賜有大功者生賜以族若叔孫陽臣是也雖公子之身有
大功德則以公子之字賜以爲族若季仲遂是也其無功德死後
乃賜族若無駭是也若子孫若爲卿其君不賜族自以王父字爲
族也氏族對之爲別散則通也故左傳問族于眾仲下云公命以
字爲展氏是也其姓與氏散亦得通故春秋有姜氏子氏妾子皆
姓而云
氏是也
國家承北平太守之後可汗乃都尉苗裔
北平太守謂李廣都尉謂李陵
以此合族尊卑可知今欲冊命可汗特加美號緣未知可汗之意
且遣諭懷待遣蕃回日別命使展禮自回鶻至塞上及黠戛斯入
貢每有詔敕上多命德裕草之德裕請委翰林學士上曰學士不
能盡人意須卿自爲之
劉沔奏歸義軍回鶻三千餘人及酋長
四十三人準詔分隸諸道皆大呼連營據滹沱河
韋懷太子後漢書注曰山海經

注云大戲之山漳沱之水出焉在今代州繁峙縣東流入定州深澤縣界九域志析代二州注皆有漳沱水不可從命

已盡誅之回鶻降幽州者前後三萬餘人皆散隸諸道 李德裕

追論維州悉怛謀事 事見二百四十四卷文宗太和五年云維州古西戎地也其地

南界江陽岷山連嶺而西不知其極北望隴山積雪如玉東望成

都若存井底地接石紐山夏禹生于石紐是也其州據高山絕頂

一面孤峯三面臨江在戎虜平川之衝是漢地入兵之路初河隴

竝沒唯此獨存吐蕃潛以婦人嫁此州門者至兩男二十年後兩

男長成竊開壘門引兵夜入遂爲所陷號曰無憂城從此得併力

於西邊更無虞于南路 并力於西邊謂吐蕃并力以攻波隴邈邈

也自長安言之西川亦在綏陽之南若吐 漢夏也無虞於南路謂西川在吐蕃之南

蕃寇蜀則南路自維茂入北路自隴州人 憑陵近甸吁食累朝貞

元中韋皋欲經略河湟須此城爲始萬旅盡銳急攻數年雖擒論

莽熱而還城堅卒不可克

見二百三十六卷德宗貞元十七十八年

臣初到西蜀外揚

國威中緝邊備其維州熟臣信令空壁來歸臣始受其降南蠻震

懾山西八國皆願內屬其蕃眾合水樓雞等城

興州有合江守捉城與樓雞城木皆

唐地沒於吐蕃既失險阨自須抽歸可減八處鎮兵坐收千餘里疆地且

維州未降前一年吐蕃猶圍魯州

魯州河曲六胡州之一也在宥州西界

豈願盟約

臣受降之初指天爲誓面許姿聞各加酬賞當時不與臣者望風

疾臣詔臣執送悉怛謀等令彼自戮臣甯忍以三百餘人命棄信

偷安累表陳論乞垂矜捨詔嚴切竟令執還體備三木輿於竹

舂及將就路冤叫嗚嗚將吏對臣無不隕涕其部送者更爲蕃帥

譏誚云旣已降彼何用送來復以此降人戮於漢境之上恣行殘

忍用固攜離至乃擲其嬰孩承以槍槊絕忠款之路快兇虐之情

從古已來未有此事雖時更一紀而運屬千年乞追獎忠魂各加
褒贈詔贈悉怛謀右衛將軍

臣光曰論者多疑維州之取捨不能決牛李之是非臣以爲昔
荀吳圍鼓鼓人或請以城叛吳弗許曰或以吾城叛吾所甚惡
也人以城來吾獨何好焉吾不可以欲城而邇姦使鼓人殺叛
者而繕守備是時唐新與吐蕃修好而納其維州以利言之則
維州小而信大以害言之則維州緩而關中急然則爲唐計者
宜何先乎悉怛謀在唐則爲向化在吐蕃不免爲叛臣其受誅
也又何矜焉且德裕所言者利也僧孺所言者義也匹夫徇利
而忘義猶恥之況天子乎譬如鄰人有牛逸而入於家或勸其
兄歸之或勸其弟攘之勸歸者曰攘之不義也且致訟勸攘者

曰彼嘗攘吾羊矣何義之拘牛大畜也鬻之可以富家以是觀之牛李之是非端可見矣

夏四月辛未李德裕乞退就閒局上曰卿每辭位使我旬日不得所今大事皆未就卿豈得求去初昭義節度使劉從諫累表言

仇士良罪惡

見二百四十五卷
文宗太和八年

士良亦言從諫窺伺朝廷及上卽

位從諫有馬高九尺獻之上不受

周禮馬八尺以上爲龍七尺以上爲騊六尺以上爲馬馬高九

尺蓋稀

有也從諫以爲士良所爲怒殺其馬由是與朝廷相猜恨遂招

納亡命繕完兵械鄰境皆潛爲之備從諫榷馬牧及商旅歲入錢五萬緡又賣鐵資鹽亦數萬緡大商皆假以牙職使通好諸道因爲販易商人倚從諫勢所至多陵轢將吏諸道皆惡之從諫疾病謂妻裴氏曰吾以忠直事朝廷而朝廷不明我志諸道皆不我與

我死他人主此軍則吾家無炊火矣乃與幕客張谷陳揚庭謀效
河北諸鎮以弟右驍衛將軍從素之子稹爲牙內都知兵馬使從
子匡周爲中軍兵馬使孔目官王協爲押牙親軍兵馬使以奴李
士實爲使宅十將兵馬使劉守義劉守忠董可武崔元度分將牙
兵谷鄆州人揚庭洪州人也從諫尋薨稹秘不發喪王協爲稹謀
曰正當如寶歷年樣爲之敬宗寶歷元年劉悟死從諫
得襲事見二百四十三卷不出百日
旌節自至但嚴奉監軍厚遺收使四境勿出兵城中暗爲備而已
使押牙姜垕奏求國醫上遣中使解朝政以醫問疾稹又逼監軍
崔士康奏稱從諫疾病請命其子稹爲留後上遣供奉官薛士幹
往諭指云恐從諫疾未平宜且就東都療之欲稍瘳別有任使仍
遣稹入朝必厚加官爵上以澤潞事謀於宰相宰相多以爲回禍

餘糧未減邊境猶須警備復討澤潞國力不支請以劉稹權知軍

事諫官及羣臣上言者亦然李德裕獨曰澤潞事體與河朔三鎮

不同河朔習亂已久人心難化是故累朝以來置之度外澤潞近

處心腹一軍素稱忠義嘗破走朱滔擒盧從史

朱滔見二百三十一卷德宗貞元

元年將盧從史見二百三十八卷德宗元和三年

頃時多用儒臣爲帥如李抱真成立此

軍

見二百二十三卷代宗永泰元年

德宗猶不許承襲使李絳護喪歸東都

見二百三

十五年忠貞

敬宗不恤國務宰相又無遠略劉悟之死因循以授從

諫從諫跋扈難制累上表迫脅朝廷今垂死之際復以兵權擅付

豎子朝廷若又因而授之則四方諸鎮誰不思效其所爲天子威

令不復行矣上曰卿以何術制之果可克否對曰稹所恃者河朔

三鎮但得鎮魏不與之同則稹無能爲也若遣重臣往諭王元逵

何宏敏以河朔自艱難以來列聖許其傳襲已成故事與澤路不

同今朝廷將加兵澤路不欲更出禁軍至山東其山東三州隸昭

義者委兩鎮攻之

山東三州謂邢洛磁也

兼令偏諭將士以賊平之日厚加

官賞苟兩鎮聽命不從旁沮撓官軍則稭必成擒矣上喜曰吾與

德裕同之休無後悔遂決意討稭羣臣言者不復入矣上命德裕

草詔賜成德節度使王元逵魏博節度使何宏敏其略曰澤路一

鎮與卿事體不同勿爲子孫之謀欲存輔車之勢但能顯立功效

自然福及後昆丁丑上臨朝稱其語要切曰當如此直告之是也

又賜張仲武詔以回鶻餘燼未滅塞上多虞專委卿禦侮元逵宏

敏得詔悚息聽命解朝政至上黨

考異曰實錄云時從諫死二十日矣按姜峯等云自四月六日

後不見本使而卒已爲從諫報朝自六日劉稭見朝政曰相公危

至辛巳纔十八日實錄自相違今不取

困不任拜詔朝政欲突入兵馬使劉武德董可武躡簾而立朝政
恐有他變遽走出積贈賚直數千緡復遣牙將梁叔文入謝薛士
榦入境俱不問從諫之疾直爲已知其死之意都押牙郭誼等乃
大出車金龍泉驛迎候敕使請用河朔事體又見監軍言之崔士
康懦怯不敢違於是將吏扶積出見士眾發喪士幹竟不得入牙
門積亦不受敕命解朝政復命上怒杖之配茶陵囚姜峯梁叔文
辛巳始爲從諫輟朝贈太傅詔劉稹護喪歸東都又召見劉從素
令以書諭稹稹不從丁亥以忠武節度使王茂元爲河陽節度使
邠甯節度使王宰爲忠武節度使茂元極曜之子宰智興之子也
黃州刺史杜牧止李德裕書自言嘗問淮西將董重質以三州之
眾四歲不破之由重質以爲由朝廷徵兵太雜客軍數少旣不能

自成一軍事須帖付地主勢羸力弱心志不一多致敗亡故初戰

二年戰則必勝是多殺客軍及二年已後客軍殫少止與陳許河

陽全軍相搏陳許謂李光顏之兵縱使唐州兵不能因虛取城唐

謂李惠蔡州事力亦不支矣其時朝廷若使鄂州壽州唐州只保

境不用進戰但用陳許鄭滑兩道全軍帖以宣潤弩手令其守隘

即不出一歲無蔡州矣今者上黨之叛復與淮西不同淮西爲寇

僅五十歲其人味爲寇之腴見爲寇之利風俗益固氣餒已成自

以爲天下之兵莫與我敵根深源闊取之固難夫上黨則不然自

安史南下不甚附隸肅宗時蔡希德建中之後每奮忠義是以鄆

公抱眞能窘田悅走朱滔李抱眞封鄆公窘田悅見二百常以孤

窮寒苦之軍橫折河朔彌梁之眾以此證驗人心忠赤習尙專一

可以盡見劉悟卒從諫求繼與扶同者只鄆州隨來中軍二千耳

扶同謂今俗謂扶台也劉悟自鄆州帥滑自滑徙潞鄆兵二千實從之唐末所謂元從也值實歷多故因以授

之今纔二十餘歲風俗未改故老尙存雖欲劫之必不用命今成

德魏博雖盡節效順亦不過圍一城攻一堡係繫穽老而已若使

河陽爲人爲壘塞天井之口

天井關在澤州晉城縣南亦名太行關開南有天井泉三所故名杜牧此

說欲杜潞人之南窺廣洛也

高壁深塹勿與之戰只以忠武武甯兩軍

忠武陳許兵武

甯徐帖以青州五千精甲宣潤二千弩手徑擣上黨不過數月必

覆其巢穴矣時德裕制置澤潞亦頗采收言牧剛直有奇節不爲

齟齬小謹敢論列大事指陳利病尤切少與李甘李中敏宋祁善

祁音元又音阮

其通古今善處成敗甘等不及也牧于詩情致最邁人號

爲小杜以別杜甫云

上雖外尊寵仇士良內實忌惡之士良頗

覺之遂以老病求散秩詔以左衛上將軍兼內侍監知省事

知內侍省

事

李德裕言於上曰議者皆云劉悟有功積未可亟誅宜全恩

禮請下百官議以盡人情上曰悟亦何功當時迫於救死耳非素心徇國也藉使有功父子為將相二十餘年國家報之足矣積何得復自立朕以為凡有功當顯賞有罪亦不可苟免也德裕曰陛下之言誠得理國之要 五月李德裕言太子賓客分司李宗閔

與劉從諫交通不宜實之東都戊戌以宗閔為湖州刺史

考異曰
獻替記

日四月十九日上言東都李宗閔我聞比與從諫交通今釋歸事如何可別與一官不要令在東都德裕曰臣等續商量上又云不可與方鎮只與一遠郡德裕又奏云須與一郡北益德裕自以宿憾因劉稹事害宗閔畏人議議故於獻替記載此語以隱其迹耳

今從實錄

河陽節度使王茂元以步騎三千守葛陂

九域志懷州河內縣有葛陂

河東節度使劉沔以步騎二千守葭州

魏收地形志上黨郡沾縣有昂車嶺其地當在

唐儀州東南界石會關之匹新步兵一千五百軍榆社九域志遼州遼山縣

有榆社鎮唐之榆社縣也宋白曰榆社縣隋開皇十六年成德節遼州遼山縣

度使王元逵以步騎三千守臨洛掠堯山堯山本柏人縣天寶元年更名屬邠州宋白曰

以唐堯大麓之地名之河中節度使陳夷行以步騎一千守翼城步兵五百

原冀氏冀氏本漢倚氏縣地後魏于古倚氏縣城南置冀氏郡及冀氏縣隋廢縣存縣屬屬晉州九域志在州東北二百八

里辛丑制削奪劉從諫及子稹官爵以元逵為澤潞北面招討使

何宏敬為南面招討使與夷行劉沔茂元合力攻討先是河朔諸

鎮有自立者朝廷必先有弔祭使次冊贈使宣慰使繼往商度軍

情必不可與勦則別除一官俟軍中不聽出然後始用兵故常及

半歲軍中得繕完為備至是宰相亦欲且遣使開諭上即命下詔

討之考異曰獻章記曰五月十一日德裕疾病先請假在宅宰相糾其日亦請假李相讓夷獨對上便決攻討之意李相歸中

書後錄聖恩四紙令德裕草制至薄晚封進明
日迷降麻處分舊本紀下制討稭今從實錄 王元逵受詔之日

出師屯趙州九域志漢州南至趙州九十五里 王寅以翰林學士承旨崔鉉為

中書侍郎同平章事翰林學士第一廳為承旨應以翰林學士久次者為之考異曰實錄李譔夷引鉉為相今從實錄

鉉元略之子也崔元略見二百二十一卷敬宗實歷元年 上夜召學士韋琮以鉉

名授之令草制宰相樞密皆不之知時樞密使劉行深楊欽義皆

愿慙不敢預事老宦者尤之曰此由劉楊懦怯墮敗舊風故也琮

乾度之子也韋乾度憲宗朝為吏部郎中 以武甯節度使李彥佐為晉絳行

營諸軍節度招討使 劉沔自代州還太原以回鶻已襲走也 築望仙

觀於禁中 六月王茂元遣兵馬使馬繼等將步騎二千軍於天

井關南科斗店劉稭遣衙內十將辭茂卿將親軍二千拒之 黠

戛斯可汗遣將軍溫件合入貢上賜之書諭以速平回鶻黑車子

乃遣使行冊命 癸酉仇士良以左衛上將軍內侍監致仕具黨
送歸私第士良教以固權寵之術曰天子不可令閒常宜以奢靡
娛其耳目使日新月盛無暇更及他事然後吾輩可以得志慎勿
使之讀書親近儒生彼見前代興亡心知憂懼則吾輩踈斥矣其
黨拜謝而去士良尋卒 丙子詔王元逵李彥佐劉沔王茂元何
宏敬以七月中旬五道齊進劉稹求降皆不得受又詔劉沔自將
兵取羗車關路以臨賊境 吐蕃鄯州節度使尙婢婢世爲吐蕃
相婢婢好讀書不樂仕進國人敬之年四十餘彝泰贊普彊起之
使鎮鄯州 彝泰達磨之兄又婢婢寬厚沈勇有謀略訓練士卒多
精勇論恐熱雖名義兵實謀篡國忌婢婢恐其後欲先滅之是
月大舉兵擊婢婢旌旗雜畜千里不絕至鎮西 鎮西軍在河州大

風震電天火燒殺裨將十餘人雜畜以百數恐熱惡之熊桓不進
婢婢謂其下曰恐熱之來視我如螻蟻以爲不足屑也今遇天災
猶豫不進吾不如迎伏以卻之使其志益驕而不爲備然後可圖
也乃遣使以金帛牛酒犒師且致書言相公舉義兵以匡國難關
境之內孰不向風苟遣一介賜之折簡敢不承命何必遠辱士眾
親臨下藩婢婢資性愚僻惟嗜讀書先贊胥授以藩維誠爲非據
夙夜慙惕惟求退居相公若賜以骸骨聽歸田里乃愜平生之素
願也恐熱得書喜徧示諸將曰婢婢惟把書卷安知用兵待吾得
國當位以宰相坐之於家亦無所用也乃復爲書勤厚答之引兵
歸婢婢聞之撫髀笑曰我國無主則歸大唐豈能事此犬鼠乎
秋七月以山南東道節度使盧鈞爲昭義節度招撫使朝廷以鈞

在襄陽寬厚有惠政得眾心故使領昭義以招懷之上遣刑部

侍郎兼御史中丞李回宣慰河北三鎮令幽州乘秋早平回鵠鎮

魏早平澤潞回太祖之八世孫也

太祖第六子禕生德貞六世至回

甲辰李德裕

言於上曰臣見勳曰河朔用兵諸道利於出境仰給度支或陰與

賊通借一縣一柵據之自以為功坐食轉輸延引歲時今請賜諸

軍詔旨令王元逵取邢州何弘敬取洺州王茂元取澤州李彥佐

劉沔取潞州毋得取縣上從之管絳行營節度使李彥佐自發徐

州行甚緩又請休兵於絳州兼請益兵李德裕言於上曰彥佐逗

遛顧望殊無討賊之意所請皆不可許宜賜詔切責令進軍翼城

九域志翼城縣在絳州東北二百里宋白曰翼城本漢絳縣地後魏明帝遣北絳縣于曲沃縣東隋改為翼城縣因縣東古翼城而名

上從之德裕因請以天德防禦使石雄為彥佐之副俟至軍中

令代之乙巳以雄爲晉絳行營節度副使仍詔彥佐進屯翼城劉
稹上表自陳亡父從諫爲李訓雪冤言仇士良罪惡由此爲權倖
所疾謂臣父潛懷異志臣所以不敢舉族歸朝乞陛下稍垂寬察
活臣一方何弘敬亦爲之奏雪皆不報李回至河朔何弘敬王元
逵張仲武皆具驍韃剋迎立於道左不敢令人控馬讓制使先行
日制使以別自兵興以來未之有也同明辯有膽氣三鎮無不奉
宦官之敕使詔王元逵奏拔宣務柵宣務柵當在
堯山縣東北堯山劉稹遣兵救堯山
元逵擊敗之詔切責李彥佐劉沔王茂元使速進兵逼賊境且稱
元逵之功以激厲之加元逵同平章事八月乙丑昭義大將李丕
來降議者或謂賊故遣丕降欲以疑誤官軍李德裕言於上曰自
用兵半年未有降者今安問誠之與詐且須厚賞以勸將來但不

宜置之要地耳 上從容言文宗好聽外議諫官言事多不著名

有如匿名書李德裕曰臣頃在中書文宗猶不爾德裕謂大和開

猶不如此此乃李訓鄭注教文宗以術御下遂成此風人主但當推誠

任人有欺罔者威以明刑孰敢哉上善之 王元逵前鋒入邢州

境已踰月

九域志趙州南至邢州境七十四里

何宏敬猶未出師元逵腰有密表稱

宏敬懷兩端丁卯李德裕上言忠武累戰有功軍聲頗振王宰年

力方壯謀略可稱

自曲環李光顏以來忠武軍屢立戰功

請賜宏敬詔以河陽河東

皆闔山險未能進軍

河陽關太行之險河東關石會昂車之險

賊屢出兵焚掠晉絳今

遣王宰將忠武全軍徑魏博直抵磁州以分賊勢宏敬必懼此攻

心伐謀之術也從之詔宰悉選步騎精兵自相魏趣磁州

相州東至魏州

百八十里北至磁州六十里

甲戌賊將薛茂卿破科斗寨擒河陽大將馬繼等

焚掠小寨一十七距懷州纔十餘里茂卿以無劉稹之命故不敢入時議者鼎沸以爲劉悟有功不可絕其嗣又從諫養精兵十萬糧支十年如何可取上亦疑之以問李德裕對曰小小進退兵家之常願陛下勿聽外議則成功必矣上乃謂宰相曰爲我語朝士有上疏沮議者我必於賊境上斬之議者乃止何宏敬聞王宰將至恐忠武兵入魏境軍中有變蒼黃出師丙子宏敬奏已自將全軍度漳水趣磁州庚辰李德裕上言河陽兵力寡弱自科斗店之敗賊勢愈熾王茂元復有疾人情危怯欲退保懷州臣竊見元和以來諸賊常視官軍寡弱之處併力攻之一軍不支然後更攻他處今魏備未與賊戰西軍閣險不進西軍謂河東晉絳兵也故賊得併兵南下自太行南趨若河陽退縮不惟虧沮軍聲兼恐震驚洛師東都謂之

洛陽書格諸日 聖詔王宰更不之磁州 魏博既出動攻磁州 亟以

朝至于洛陽

故請詔王宰移軍

忠武軍應援河陽不惟扞蔽東都兼可臨制魏博若慮全軍供餉

難給且令發先鋒五千人赴河陽亦足張聲勢甲申又奏請敕王

宰以全軍繼進仍急以器械給帛助河陽窘乏上皆從之王茂元

軍萬善劉稹遣牙將張巨劉公直等會薛茂卿其攻之期以九月

朔園萬善乙酉公直等潛師先過萬善南五里焚雍店巨引兵繼

之過萬善視知城中守備單弱欲專有功遂攻之日昇城且拔乃

使人告公直等時義成軍適至 時以河陽兵寡令王宰以忠武市

合義成兵援之義成軍滑州兵也

茂元困急欲帥眾棄城走都虞候孟章諫曰賊眾自有前卻半在

雍店半在此乃亂兵耳今義成軍纔至尙未食聞僕射走則自潰

矣顧且阻留茂元乃止會日暮公直等不至巨引兵退始登山 登

太

行阪微雨晦黑自相驚曰追兵近矣皆走人馬相踐墜崖谷死者

甚眾上以王茂元士卒兩節度使其處河陽非方庚寅李德裕

等奏茂元習吏事而非將才請以宰為河陽行營攻討使茂元病

愈止令鎮河陽病困亦免他牒九月辛卯以宰兼河陽行營攻討

使何宏敬奏拔肥鄉平恩肥鄉漢郡魏縣地曹魏置肥鄉縣至唐與平恩皆屬洺州九域志肥鄉在

州東三十五里平恩在州東九十里殺傷甚眾得劉稹勝帖皆謂官軍為賊云遇之

即須痛殺癸巳上謂宰相何宏敬已克兩縣可釋前疑謂王元逵密奏宏敬

持兩端也既有殺傷雖欲持兩端不可得已乃加宏敬檢校左僕射

丙午河陽奏王茂元薨李德裕奏王宰止可令以忠武節度使將

萬善營兵不可使兼領河陽恐其不愛河陽州縣恣為侵擾又河

陽節度先領懷州刺史常以判官攝事割河南五縣租賦隸河陽

見二百二十七卷
德宗建中二年

不若遂以五縣置孟州

縣置孟州因孟津爲名也

其懷州別

置刺史侯昭義平日仍割澤州隸河陽節度則太行之險不在昭

義而河陽遂爲重鎮東都無復憂矣上采其言戊申以河南尹敬

昕爲河陽節度懷孟觀察使王宰將行營以扞敵昕供饋餉而已

以霖雨理因免京兆府秋稅

庚戌以石雄代李彥佐爲晉絳

行營節度使

考異曰寶曆召彥佐入奉朝請俟罷兵日赴鎮按彥佐前已罷武衛今又罷晉絳復赴何鎮實錄謂也

令自冀氏取潞州仍分兵屯冀城以備侵軼

是月吐蕃論恐熱

屯大夏川

大夏川在河州大夏縣西有大夏水漢古縣也

尙婢婢遣其將厖結心及莽羅

辭呂將精兵五萬擊之至河州南莽羅辭呂伏兵四萬於險阻厖

結心伏萬人於柳林中以千騎登山飛矢繫書罵之恐熱怒將兵

數萬追之厖結心陽敗走時爲馬乏不進之狀恐熱追之益急不

健行數十里伏兵發斷其歸路夾擊之會大風雨溪谷皆溢恐熱

大敗伏尸五十里溺死者不可勝數恐熱單騎遁歸石雄代李

彥佐之明日即引兵踰烏嶺唐史五代志翼城縣有烏嶺山破五寨殺復千計時

王宰軍萬善劉沔軍石會皆願望未進上得雄捷書喜甚冬十月

庚申臨朝謂宰相曰雄義而有勇真良將也考異曰劉替代振記皆云十月五日上書

石雄破賊而實錄已已奏到庚午對宰臣言乃是十五日恐誤李德裕因言比年前潞州市有男

子磬折唱曰磬折言曲所其身如磬之形石雄七千人至矣劉從諫以為妖言

斬之破潞州者必雄也詔賜雄帛為優賞雄悉置軍門自依士卒

例先取一匹餘悉分將士故士卒樂為之致死初劉沔破回鶻

得太和公主張仲武疾之由是有隙上使李回至幽州和解之仲

武意終不平朝廷恐其以私憾敗事辛未徙沔為義成節度使以

前荆南節度使李石為河東節度使 党項寇鹽州以前武甯節

度使李彥佐為朔方靈鹽節度使 十一月邠甯奏党項入寇李

德裕奏党項愈熾不可不為區處聞党項分隸諸鎮

綏銀靈鹽夏邠甯延麟勝

慶等州皆有党項諸鎮分鎮之剽掠於此則亡逃歸彼節度使各利其駝馬不為

擒送以此無由禁戢臣屢奏不若使一鎮統之陛下以為一鎮專

領党項權太重臣今請以皇子兼統諸道擇中朝廉幹之臣為之

副居於夏州理其辭訟庶為得宜乃以克王岐為靈夏等六道元

帥

岐皇太子也

兼安撫党項大使又以御史中丞李回為安撫党項副使

史館修撰鄭亞為元帥判官令齎詔往安撫党項及六鎮百姓

六鎮

鹽州夏州靈武經原及振武州也

安南經略使武渾役將士治城將士作亂燒

城樓劫府庫渾奔廣州監軍段士則撫安亂眾 忠武軍素號精

勇王宰治軍嚴整昭毅人甚憚之醉茂卿以科斗寨之功意望超
遷或謂劉稹曰留後所求者節耳茂卿太深入多殺官軍激怒朝
廷此節所以來益遲也由是無賞茂卿慍懟密與王宰通謀十二
月丁巳宰引兵攻天井關茂卿小戰遽引兵走宰遂克天井關守
之關東西寨聞茂卿不守皆退走宰遂焚大小箕村茂卿入澤州
密使謀召宰進攻澤州當為內應宰疑不敢進失期不至茂卿拊
膺頓足而已稹知之誘茂卿至潞州殺之并其族以兵馬使劉公
直代茂卿安全慶守烏嶺李佐弼守彫黃嶺彫黃嶺在潞州長子縣西郭倕守
石會康良佐守武鄉武鄉漢垣縣後魏改曰潞縣移治於南亭川武后加武字屬潞州僚誼之姪
也戊辰王宰進攻澤州考異曰一品集十月二十三日狀緣王宰兵已深入須取澤州按此月三日宰始得
天井關于十月之末豈能深入取澤州與劉公直戰不利公直乘
葦十二月十三日狀二字誤在月下耳

勝復天井關甲戌宰進擊公直大破之遂圍陵川克之

陵川漢沱氏縣地隋

開皇十六年置陵川縣唐屬澤州九域志在州東北一百五里

河東秦克石會關洛州刺史李恬

石之從兄也石至太原劉稹遣軍將賈羣詣石以恬書與石云稹

願舉族歸命相公奉從諫喪歸葬東都石囚羣以其書聞李德裕

上言今官軍四合捷書日至賊勢窮蹙故偽輸誠款冀以緩師稍

得自完復來侵軼望詔石荅恬書云前書未敢聞奏若耶君誠能

悔過舉族而縛待罪境上則石當親往受降護送歸闕若虛為誠

款先求解兵次望洗雪則石必不敢以百口保人

考異曰一品集正月四日狀曰

臣等得李石狀報劉稹潛有款誠云云又曰今饋運之費計至春末並足如二月已來尚未修減然議納降亦未為晚又草詔賜石

曰必不得因此延令其得計仍不得先受章表便與奏聞實錄上既崔瑊仍詔敢言罷兵者送賊境戮之德裕狀正月四日上然

石發奏必在揚弁仍望詔諸道乘其上下離心速進兵攻討不過未亂前故置於此

旬朔必內自生變上從之右拾遺崔碣上疏請受其降上怒貶碣

鄧城令 初劉訥破回鶻留兵三千戍橫水柵河東行營都知兵

馬使王逢奏乞益榆社兵王逢時以河東兵屯榆社詔河東以兵二千赴之時

河東無兵守倉庫者及工匠皆出從軍李石召橫水戍卒千五百

人使都將楊弁將之詣逢壬午戍卒至太原先是軍士出征人給

絹二匹劉訥之去竭府庫自隨石初至軍用之以已絹益之人纔

得一匹時已歲盡軍士求過正旦而行監軍呂義忠累牒趣之楊

弁因眾心之怒又知城中空虛遂作亂

而會昌四年春正月乙酉朔楊弁帥其眾剽掠城市殺都頭梁季

叶李石奔汾州太原府西南至汾州一百餘里弁據軍府釋賈羣之囚使其姪與

之俱詣劉稹約為兄弟稹大喜石會關守將楊珍聞太原亂復以

關降於種戊子呂義忠遣使言狀朝議喧然或言兩地皆應罷兵

兩地謂并路也

王宰又上言遊弈將得劉稹表臣近遣人至澤潞賊有意

歸附若許招納乞降詔命李德裕上言宰膺受稹表遣人入賊中

事見十卷

會不聞奏觀宰意似欲擅招撫之功昔韓信破田橫

事見十卷

李靖擒頡利

見一百九十三卷

皆因其請降潛兵掩襲止可令

王宰失信豈得損朝廷威命建立奇功實在今日必不可以太原

小擾失此事機望即遣供奉官至行營督其進兵掩其無備必須

劉稹與諸將皆舉族面縛方可受納

考異曰一品集奏狀云如劉稹自來卻令送入轉不得受

按稹若自來豈有卻送入之理恐是稹下脫不字

兼遣供奉官至晉絳行營密諭石雄以

王宰若納劉稹則雄無功可紀雄於垂成之際須自取奇功勿失

此便又為相府與宰書書背王承宗雖逆命猶遣弟承恭奉表詣

張相祈哀又遣其子知感知信入朝憲宗猶未之許

見二百四十三卷元和十三

年今劉稹不詣尙書面縛又不遣血屬祈哀置章表於衢路之間遊弈將不卽毀除實恐非是況稹與楊弁通姦逆狀如此而將帥大臣容受其詐是私惠歸於臣下不救在於朝廷事體之間交恐不可自今更有章表宜卽所在焚之惟面縛而來始可容受德裕又上言太原人心從來忠順止是貧虛賞犒不足況千五百人何能爲事必不可姑息寬縱且用兵未能深慮所在動心頃張延賞爲張拙所逐逃奔漢州還入成都

事見德宗紀

望詔李石義忠還赴太原行營召旁近之兵討除亂者上皆從之是時李石已至晉州詔復還太原辛卯詔王逢悉留太原兵守榆社以易定千騎宣武充海步兵三千討楊弁又詔王元逵以步騎五千自土門入應接逢

軍

考異曰實錄詔側近行營量抽兵騎撲又詔王元逵以忻州刺兵五千掘土門張仲武把腰門以爲聲援今從伐叛記

史李丕奏楊弁遣人來爲遊說臣已斬之兼斷其北出之路

恐楊弁之

軍北出弱勁雖勇與同鵠餘眾合故備具路

發兵討之辛丑上與宰相議太原事李德

裕曰今太原兵皆在外爲亂者止千餘人諸州鎮必無應者計不

日誅翦惟應速詔王逢進軍至城下必自有變上曰仲武見鎮魏

討澤潞有功必有慕羨之心使之討太原何如德裕對曰鎮州趣

太原路最便近

九域志鎮州西至太原府四百三十里武宗之意蓋欲使張仲武出兵過鎮州趣太原耳仲武

去年討回鶻與太原爭功恐其不戢士卒平人受害乃止上遣中

使馬元實至太原曉諭亂兵且覘其強弱楊弁與之酣飲三日且

賂之戊申元實自太原還上遣詣宰相議之元實於眾中大言相

公須早與之節李德裕曰何故元實曰自牙門至柳子列十五里

曳地光明甲

柳子列因其地列植柳樹而名

若之何取之德裕曰李相正以太原

無兵

李石舊相也故呼爲李相

故發憤水兵赴榆社庫中之甲盡在行營弁何

能遽致如此之眾乎元寶曰太原人勁悍皆可爲兵弁召募所致

耳德裕曰召募須有貨財李相止以欠軍士絹一匹無從可得故

致此亂弁何從得之元寶辭屈德裕曰從其有十五里光明甲必

須殺此賊因奏稱楊弁微賊決不可恕如國力不及甯捨劉稭河

東兵戍榆社者聞朝廷令客軍取太原恐妻孥爲所屠滅乃擁監

軍呂義忠自取太原王子克之生擒楊弁盡誅亂卒 三月中寅

朔日有食之 乙卯呂義忠奏克太原丙辰李德裕言於上曰王

宰久應取澤州今已遷延兩月蓋宰與石雄素不相叶

王宰父相與奏石雄

罪流白州故不叶今得澤州距上黨猶二百里而石雄所屯距上黨纔百

五十里宰恐攻澤州綴昭義大軍而雄得乘虛入上黨獨有其功
耳又宰生子晏實其父智興愛而子之晏實今爲磁州刺史爲劉
稱所質宰之願望不敢進或爲此也上命德裕草詔賜宰督其進
兵且曰朕願茲小寇終不貸刑亦知晏實是卿愛弟將申大義在
抑私懷 丁巳以李石爲太子少傅分司以河中節度使崔元式

爲河東節度使石雄爲河中節度使元式元略之弟也 己未石

雄拔良馬等三寨一堡

初退輝李萬江歸李抱玉於潞州牧津梁寺地美水草馬如鴨而健世謂之津梁種

良馬寨蓋置於其地

辛酉太原獻楊弁及其黨五十四人皆斬於狗脊嶺

按宋白續通典狗脊嶺在京城東市

壬申李德裕言於上曰事固有激發而成功

者陛下命王宰趣磁州而何宏敬出師遣客軍討太原而戍兵先
取楊弁今王宰久不進軍請徙劉沔鎮河陽仍令以義成精兵二

千直抵萬善處宰肘腋之下若宰識朝廷此意必不敢淹留若宰

進軍河以重兵在南聲勢亦壯上曰善戊寅以義成節度使劉河

為河陽節度使王逢擊昭義將康良佺敗之良佺棄石會嗣退

屯鼓腰嶺鼓腰嶺當在潞州武鄉縣北考異曰實錄王宰擊鼓將

康良佺敗棄石會嗣移軍入三十里守鼓腰嶺按石會

嗣在潞州北與河東接壤時在澤州結夏斯遣將軍諦德伊斯

南何以得敗良佺蓋逢字誤為宰耳

難珠等入貢言欲徙居回鶻耳帳請發兵之期集會之地賜詔

諭以今秋可汗擊回鶻黑車子之時當令幽州太原振武天德四

鎮出兵要路邀其亡逸便申冊命並依回鶻故事朝廷以回鶻

衰微吐蕃內亂議復河湟四鎮十八州開元之盛龍右河西分為

蕃分為四鎮也十八州秦源河渭蘭乃以給事中劉濤為巡邊使

郭階成沈寶麻府臬客甘涼瓜沙也考異曰實錄以濤為巡邊使在開年二月壬寅壬寅二十五日也

案一品集會昌四年二月二十二日奏狀曰緣李回等稱歸夏斯

使云今冬必欲就黑車子收回鵲可汗餘燼切望國家兵馬應修
點夏斯使回口已賜教書許令幽州太原振武天德各于要路出
兵邀截又曰仍令代北諸軍縱縱排比又曰其幽州兵馬至多不
必先令排比待至冬初續降中使賜詔點夏斯使來在四年二月
德祐奏狀所謂今冬防秋冬初者皆四年事也不容至五年二月
始以濛爲巡邊使濛之奉使要在今年春夏不知的何月日且附
於此使之先備器械糗糧及詞吐蕃守兵眾寡又令天德振武河東
訓卒礪兵以俟今秋點夏斯擊回鵲邀其潰敗之眾南來者皆委
濛與節度團練使詳議以聞濛晏之孫也 以道士趙歸真爲右
街道門教授先生 吐蕃論恐熱之將爰藏豐贊惡恐熱殘忍降
於尙婢婢恐熱發兵擊婢婢於鄯州婢婢分兵爲五道拒之恐熱
退保東谷 九域志河州東南一十五里有東谷堡宋熙寧七年道 婢婢爲木柵圍之絕其水
原恐熱將百餘騎突圍走保薄寒山餘眾皆降於婢婢 夏四月
王宰進攻澤州 上好神仙道士趙歸真得幸諫官屢以爲言丙

子李德裕亦諫曰歸真敬宗朝罪人

見二百四十三卷寶歷二年

不宜親近上

曰朕宮中無事時與之談道滌煩耳至於政事朕必問卿等與次對官雖百歸真不能惑也德裕曰小人見勢利所在則奔趨之如夜蛾之投燭聞旬日以來歸真之門車馬輻湊願陛下深戒之

戊寅以左僕射王起同平章事充山南西道節度使起以文臣未

嘗執政直除使相前無此比固辭

唐中世以後節度使同平章事者則謂之使相

上曰宰

相無內外之異朕有關失卿飛表以聞李德裕以州縣佐官太

冗奏令吏部郎中柳仲郢裁減六月仲郢奏減一千二百一十四

員

考異曰歐若記曰減得二千二百員新傳曰罷二千餘員舊柳仲郢傳曰減一千二百員今從之

仲郢公綽之子

也宦官有發仇士良宿惡於其家得兵仗數千詔削其官爵籍

沒家貲

六月崔鉉奏右僕射崔瑒前領鹽鐵轉運時妄費朱滑

院鑄鐵錢九十萬緡又幼珙與劉從諫厚數護其姦貶珙澄州刺史再貶恩州司馬 秋七月辛卯上與李德裕議以王逢將兵屯翼城上曰聞逢用法太嚴有諸對曰臣亦嘗以此詰之逢言前有白刃法不嚴其誰可進上曰言亦有理卿更召而戒之德裕因言劉稹不可赦上曰固然德裕曰昔李懷光未平京師蝗旱米斗千錢太倉米供天子及六宮無數旬之儲德宗集百官遣中使馬欽緒詢之左散騎常侍李泌取桐葉搏破以授欽緒獻之德宗召問其故對曰陛下與懷光君臣之分如此葉不可復合矣由是德宗意定既破懷光遂用爲相獨任數年上曰亦大是奇士 上聞揚州倡女善爲酒令 酒令者行令而飲酒也唐人多好爲之卻掃編曰皇甫松著醉鄉日月錄散子令又有旗幡令 閨屋令拋打令今人不復曉其法 惟優伶家猶用手打令以爲戲云 敕淮南監軍選十七人獻之監

軍請節度使杜悰同選且欲更擇良家美女教而獻之悰曰監軍
自受敕悰不敢預聞監軍再三請之不從監軍怒具表其狀上覽
表默然左右請并敕節度使同選上曰敕藩方選倡女入宮豈聖
天子所爲杜悰不徇監軍意得大臣體眞宰相才也朕甚愧之遽
敕監軍勿復選甲辰以悰同平章事兼度支鹽鐵轉運使及悰中
謝既受命入謝上勞之曰卿不從監軍之言朕知卿有致君之心
謝謂之中謝今相卿如得一魏徵矣